

北史

冊七

北史卷八十

唐

李

延

壽

撰

列傳第六十八

外戚

賀訥

姚黃眉

杜超

賀迷

閻毗

馮熙

李惠

高肇

胡國珍

從曾孫
長粲

楊騰

乙弗繪

趙猛

胡長仁

隋文帝外家呂氏

夫左賢右戚尚德尊功有國者所以御天下也殷肇王基不藉莘氏爲佐周成
王業未聞姒姓爲輔然歷觀累代外戚之家乘母后之權以取高位厚秩者多
矣而鮮能有克終之美必懼顛覆之患何哉皆由乎居上不以至公任物在下
徒用私寵要榮繭犢引大車升質任厚棟無德而尊不知紀極忽於滿盈之戒
罔念高危之咎故鬼瞰其室憂必及之所以殺身傾族相繼於西京也夫誠著

艱難功宣社稷不以謙沖自牧未免顛蹶之禍而況道不足以濟時仁不足以利物自矜於己以富貴驕人者乎魏道武初賀訥有部衆之業翼成皇祚其餘或以勞動或緣恩澤齊氏后妃之族多自保全胡長仁以譖訴貽禍斛律光以地勢被戮俱非女謁盛衰之所致也婁昭自以佐命之功崇其名器且霸業權輿時方同德陵暴之釁因茲而起其靖德昭訓二門並良家遺孽守死無暇固不足涉言又子非繼世權難妄假昭信非惟素門履道訖構廢辱威望之地自致無由有周御歷后門初無與政既而末跡竊權竟移鼎璽斯乃西漢覆車之轍魏文所以深誠隋文潛躍之初獻后便相推轂煬帝大橫方兆蕭妃密勿經綸是以恩禮綢繆始終不易然外內親戚莫預朝權昆弟在位亦無殊寵至於居擅玉堂家稱金穴暉光戚里熏灼四方將三司以比儀命五侯而同拜者終始一代寂無聞焉考之前王可謂矯其弊矣故雖時經擾攘無有陷於不義市朝遷貿而皆得以保全比夫憑藉寵私階緣恩澤乘其非據旋就顛隕者豈可同日而言哉此所謂愛之以禮者也案外戚魏書有賀訥劉羅辰姚黃眉杜超

賀迷闔毗馮熙李峻李惠高肇于勁胡國珍李延實齊書有趙猛婁叡尔朱文暢鄭仲禮李祖昇元蠻胡長仁周書不立此篇隋書有獨孤羅蕭歸今以劉羅辰李峻于勁李延實婁叡尔朱文暢鄭仲禮李祖昇元蠻獨孤羅蕭歸命附其家傳其餘並入此篇又檢楊騰乙弗繪附之魏末以備外戚傳云

賀訥代人魏道武皇帝之舅獻明后之兄也其先世爲君長祖紇尙平文女父野于尙昭成女遼西公主昭成崩諸部乖亂獻明后與道武及衛秦二王依訥會苻堅使劉庫仁分攝國事道武還居獨孤訥總攝東部爲大人遷居大甯行其恩信衆多歸之侔於庫仁苻堅假訥鷹揚將軍後劉顯謀逆道武輕騎歸訥訥驚拜曰官家復國當念老臣帝笑答曰誠如舅言要不亡也訥中弟染干蠶暴忌帝常圖爲逆每爲皇姑遼西公主擁護故染干不得肆其禍心諸部大人請訥兄弟求舉道武爲主染干不從遂與諸大人勸進道武登代王位于牛川及帝討吐突隣部訥兄弟遂懷異圖率諸部救之帝擊之大潰訥西遁衛辰遣子直力靱征訥告急請降道武簡精騎二十萬救之遂徙訥部落及諸弟處之

東界訥又通於慕容垂垂以訥爲歸善王染干謀殺訥而代立訥遂與染干相攻垂遣子麟討之敗染干於牛都破訥於赤城道武遣師救訥麟乃引退訥從道武平中原拜安遠將軍其後離散諸部分土定居不聽遷徙其君長大人皆同編戶訥以元舅甚見尊重然無統領以壽終於家訥弟盧亦從平中原以功賜爵遼西公帝遣盧會衛王儀伐鄴而盧自以帝之季舅不肯受儀節度帝遣使切責之盧遂忿恨與儀司馬丁建構成其嫌彌加猜忌會道武敕儀去鄴盧亦引歸道武以盧爲廣川太守盧性雄豪恥居冀州刺史王輔下襲殺輔奔慕容德德以爲并州刺史廣寧王廣固敗盧亦沒訥從父弟悅初道武居賀蘭部下人情未甚附唯悅舉部隨從又密爲帝祈禱天神請成大業出於誠至帝嘉之甚見寵待後平中原以功賜爵鉅鹿侯進爵北新卒子泥襲爵後降爲肥如侯道武崩京師草泥出舉烽於安陽城北賀蘭部人皆往赴之明元卽位乃罷詔泥與元渾等八人拾遺左右與北新侯安同持節行并定二州劾奏并州刺史元六頭等皆伏罪州郡肅然後從太武征赫連昌以功進爵爲琅邪公軍

國大議每參豫焉又征蠕蠕爲別道將坐逐賊不進詐增虜當斬贖爲庶人久之拜光祿勳爲外都大官復本爵卒官子醜建襲

姚黃眉姚興之子明元昭哀皇后之弟也姚泓滅黃眉間來歸魏明元厚禮待之賜爵隴西公尙陽翟公主拜駙馬都尉隸戶二百太武卽位遷內都大官後拜太常卿卒贈雍州刺史隴西王諡曰獻陪葬金陵黃眉寬和溫厚希言得失太武悼惜之故贈禮有加

杜超字祖仁魏郡鄴人密皇后之兄也少有節操太常中爲相州別駕始光中太武思念舅氏以超爲陽平公尙南安長公主拜駙馬都尉位大鴻臚卿車駕幸其第賞賜巨萬神麤三年以超行征南大將軍太宰進爵爲王鎮鄴追加超父豹鎮東大將軍陽平景王母曰鉅鹿惠君真君五年超爲帳下所害太武臨其喪哀慟者久之諡曰威王長子道生賜爵城陽侯後爲秦州刺史進爵河東公道生弟鳳凰襲爵加侍中特進太武追思超不已欲以鳳凰爲定州刺史鳳凰不願違離闕庭乃止鳳凰弟道儁賜爵發干侯鎮枋頭除兗州刺史超旣薨

復授超從弟遺侍中安南將軍開府相州刺史入爲內都大官進爵廣平王遺性忠厚類歷州郡所在著稱薨贈太傅諡曰宣王長子元寶位司空元寶弟胤寶司隸校尉元寶又進爵京兆王及歸而父遺喪明當入謝元寶欲以表聞文成未知遺薨怪其遲召之元寶將入時人止之曰宜以家憂自辭元寶欲見其寵不從遂冒哀而入未幾以謀反伏誅親從皆斬唯元寶子世衝逃免時朝議欲追削超爵位中書令高允上表理之後兗州故吏汲宗等以道儻遺惠在人前從坐爵受誅委骸土壤求得收葬書奏詔義而聽之贈散騎常侍安南將軍南康公諡曰昭世衝襲遺公爵

賀迷代人太武敬哀皇后之從父也皇后生景穆初后少孤父兄近親唯迷故蒙賜爵長鄉子卒贈光祿大夫五原公

閻毗代人蠕蠕主大檀之親屬太武時自其國來降毗卽恭皇后之兄也后生文成文成大安二年以毗爲平北將軍賜爵河東公弟紇爲寧北將軍賜爵零陵公其年並加侍中進爵爲王毗征東將軍評尚書事紇征西將軍中都大官

自餘子弟賜爵爲王者二人公五人侯六人子三人同時受拜所以隆崇舅氏
和平二年追謚后祖父延襄康公辰定襄懿王毗薨贈太尉追贈毗妻河東王
妃子惠襲紇薨贈司空子豆後賜名莊太和中初立三長以莊爲定戶籍大使
甚有時譽十六年例降爵後爲七兵尚書卒紇弟染位外都大官冀州刺史江
夏公卒先是文成以乳母常氏有保護功既卽位尊爲保太后後尊爲皇太后
興安二年太后前兄英字世華自肥如令超爲散騎常侍鎮軍大將軍賜爵遼
西公弟喜鎮軍大將軍祠曹尚書帶方公三妹皆封縣君妹夫王曙爲平州刺
史遼東公追贈英祖父苻堅扶風太守亥爲鎮西將軍遼西蘭公勃海太守澄
爲侍中征東大將軍太宰遼西獻王英母許氏博陵郡君遣兼太常盧度世持
節改葬獻王於遼西樹碑立廟置守冢百家太安初英爲侍中征東大將軍太
宰進爵爲王喜左光祿大夫改封燕郡從兄泰爲安東將軍朝鮮侯訢子伯夫
散騎常侍選部尚書次子員金部尚書喜子振太子庶子三年英領太師評尚
書事內都大官伏寶泰等州刺史五年詔以太后母宋氏爲遼西王太妃和平

元年喜爲洛州刺史初英事宋不能謹而睹奉宋甚至就食於和龍無車牛宋疲不進睹負宋於笈至是宋於英等薄不如睹之篤謂太后曰何不王睹而黜英太后曰英爲長兄門戶主也家內小小不順何足追計睹雖盡力故是他姓奈何在英上本州郡公亦足報耳天安中英爲平州刺史訖爲幽州刺史伯夫進爵范陽公英濁貨徙敦煌諸常自與公及至是皆以親疏受爵賜田宅時爲隆盛後伯夫爲洛州刺史以賊汙欺妄徵斬於京師承明元年徵英復官薨謚遼西平王始英之徵也夢曰墜其所居黃山下水中村人以車牛挽致不能出英獨抱載而歸聞者異之後員與伯夫子禽可共爲飛書誣謗朝政事發有司執憲刑及五族孝文以明太后故罪止一門訖年老赦免歸家恕其孫一人扶養之給奴婢田宅其家僮入者百人金錦布帛數萬計賜尚書已下宿衛已上其女壻及親從在朝皆免官歸本鄉十一年孝文文明太后以文昭太后故悉出其家前後沒入婦女以喜子振試守正平郡卒

馮熙字晉國長樂信都人文明太后之兄也祖弘北燕王太武平遼海熙父朗

內徙官至秦雍二州刺史遼西郡公坐事誅文明太后臨朝追贈假黃鉞太宰
燕宣王立廟長安熙生於長安爲姚氏魏母所養以叔父樂陵公邈因戰入蠕
蠕魏母攜熙逃避至氐羌中撫育年十二好弓馬有勇幹氏羌皆歸附之魏母
惡其如此將還長安始就博士學問從師受孝經論語好陰陽兵法事及長游
華陰河東二郡間性汎愛不拘小節人無士庶來則納之熙姑先入掖庭爲太
武左昭儀妹爲文成帝后卽文明太后也使人外訪知熙所在徵赴京師拜冠
軍將軍賜爵肥如侯尙景穆女博陵長公主拜駙馬都尉出爲定州刺史進爵
昌黎王獻文卽位爲太傅累拜內都大官孝文卽位文明太后臨朝帝乃承旨
以熙爲侍中太師中書監領祕書事熙以頻履師傅又中宮之寵爲羣情所駭
心不自安乞轉外任文明太后亦以爲然除都督洛州刺史侍中太師如故洛
陽雖經破亂而舊三字石經宛然猶在至熙與常伯夫相繼爲州廢毀分用大
至頽落熙爲政不能仁厚而信佛法自出家財在諸州鎮建佛圖精舍合七十
二處寫十六部一切經延致名德沙門日與講論精勤不倦所費亦不貲而營

塔寺多在高山秀阜傷殺人牛有沙門勸止之熙曰成就後人唯見佛圖焉知殺人牛也其北芒寺碑文中書侍郎賈元壽詞孝文頻登北芒寺親讀碑文稱爲佳作熙爲州因取人子女爲奴婢有容色者幸之爲妾有子女數十人號爲貪縱後授內都大官太師如故熙事魏母孝謹如事所生魏母卒乃散髮徒跣水漿不入口三日詔不聽服熙表求依趙氏之孤帝以熙情難奪聽服齊衰期後以例降改封京兆郡公帝納其女爲后曰白武通云王所不臣數有三焉妻之父母抑言其一此所謂供奉宗廟不欲奪私心然吾季著於春秋無臣證於往牒旣許通體之一用開至尊之敬比長秋配極陰政旣敷未聞有司陳奏斯式可詔太師輟臣從禮又勒集書造儀付外孝文前後納熙三女二爲后一爲左昭儀由是馮氏寵貴益隆賞賜累巨萬帝每詔熙上書不臣入朝不拜熙上書如舊熙於後遇疾綿寢四載詔遣監問道路相望車駕亦數幸焉將遷洛帝親與熙別見其困篤獻欷流涕密敕宕昌公主遇曰太師萬一卽可監護喪事十九年薨於代車駕在淮南留臺表聞還至徐州乃舉哀爲制總服詔有司預

辨凶儀并開魏京之墓令公主之柩俱向伊洛凡所營送皆公家爲備又敕代
給綵帛前後六千匹以供凶用皇后詣代都赴哭太子恂亦赴代哭弔將葬贈
假黃金侍中都督十州諸軍事大司馬太尉冀州刺史加黃屋左纁備九錫前
後部羽葆鼓吹皆依晉太宰安平獻王故事有司奏諡詔曰可以威彊恢遠曰
武奉諡於公柩至七里澗帝服縗往迎叩靈悲慟而拜焉葬日送臨墓所親作
誌銘主生二子誕脩誕字思正脩字寶業皆姿質妍麗年纔十餘文明太后俱
引入禁中申以教誡然不能習讀經史兄弟並無學術徒整飾容儀寬雅恭謹
而已誕與孝文同歲幼侍書學仍蒙親待尙帝妹樂安長公主拜駙馬都尉侍
中征西大將軍南平王脩侍中鎮北大將軍尙書東平公又除誕儀曹尙書知
殿中事及罷庶姓王誕爲侍中都督中外諸軍事中軍將軍特進改封長樂郡
公誕拜官孝文立於庭遙受其拜旣訖還室脩降爲侯誕脩雖並長宮禁而性
趣乖別誕性淳篤脩乃浮競誕亦未能誨督其過然時言於太后孝文嚴責之
至於楚捶由是陰懷毒恨遂結左右有憾於誕者求藥欲因食害誕事覺帝自

詰之具得情狀誕引過謝乞全脩命帝以誕父老又重其意不致於法撻之百餘黜爲平城百姓脩妻司空穆亮女也求離婚請免官帝引管蔡事皆不許帝寵誕仍作同輿而載同案而食同席坐臥彭城王勰北海王詳雖直禁中然親近不及十六年以誕爲司徒帝旣愛誕除官日親爲制三讓表并啓將拜又爲其章謝尋加車騎大將軍太子太師十八年帝謂其無師傅獎導風誕深自誨責從駕南伐十九年至鍾離誕遇疾不能侍從帝日省問醫藥備加帝銳意臨江乃命六軍發鍾離南轅與誕泣訣左右皆入無不掩涕時誕已憊然彊坐視帝悲而淚不能下言夢太后來呼臣帝嗚咽執手而出遂行是日去鍾離五十里許昏時告誕薨問帝哀不自勝時崔慧景裴叔業軍在中淮去所次不過百里帝乃輕駕西還從者數千人夜至誕薨所拊屍哀慟若喪至戚達旦聲淚不絕從者亦迭舉音帝以所服衣帽充襚親自臨視徹樂去膳宣敕六軍止臨江之駕帝親北度慟哭極哀喪至洛陽車駕猶在鍾離詔留守賜賻物布帛五千匹穀五千斛以供葬事贈假黃鉞使持節大司馬領司徒侍中都督太師駙馬

公如故加以殊禮備錫九命依晉大司馬齊王攸故事有司奏諡詔曰案諡法主善行德曰元柔剋有光曰懿昔貞惠兼美受三諡之榮忠武雙徽錫兩號之茂式準前訓宜契具瞻既自少綢繆知之惟朕案行定名諡曰元懿帝又親爲作碑文及挽歌詞皆窮美盡哀事過其厚車駕還京遂親至誕墓停車而哭使彭城王勰詔羣官脫朱衣服單衣介幘而哭司徒貴者示以朋友微者示如寮佐公主貞厚有禮度產二男長子穆字孝和襲熙爵避皇子愉封改封扶風郡公尙孝文女順陽長公主拜駙馬都尉歷員外通直散騎常侍穆與叔輔興不和輔興亡贈相州刺史祖載在庭而穆方高車良馬恭受職命言宴滿堂忻笑自若爲御史中尉東平王匡所劾後位金紫光祿大夫遇害河陰贈司空雍州刺史子罔字景昭襲爵昌黎王尋以庶姓罷王仍襲扶風郡公子峭字子漢齊受禪例降穆弟顥襲父誕長樂郡公脩弟聿字寶興廢后同產兄也位黃門郎信都伯後坐妹廢免爲長樂百姓宣武時卒於河南尹聿同產弟風幼養於宮文明太后特加愛念數歲賜爵至北平王拜太子中庶子出入禁闈寵侔二兄

孝文親政後恩寵稍衰降爵爲侯幽后立乃復敘用后死亦冗散卒贈青州刺史崔光之兼黃門也與聿俱直光每謂之曰君家富貴大盛終必衰敗聿云我家何負四海乃呪我也光云以古推之不可不慎時熙爲太保誕司徒太子太傅脩侍中尙書聿黃門廢后在位禮愛未弛是後歲餘脩以罪棄熙誕喪亡后廢聿退時人以爲盛必衰也

李惠中山人思皇后之父也父蓋少知名歷位殿中都官二尙書左將軍南郡公初太武妹武威長公主故涼王沮渠牧犍之妻太武平涼州頗以公主通密計之助故寵遇差隆詔蓋尙焉蓋妻與氏以是出後蓋加侍中駙馬都尉殿中都官尙書右僕射卒官贈征南大將軍定州刺史中山王諡曰莊惠弱冠襲父爵妻襄城王韓頽女生二女長卽后也惠歷位散騎常侍侍中征西大將軍秦益二州刺史進爵爲王轉雍州刺史征南大將軍加長安鎮大將軍長於思察雍州聽事有燕爭巢鬪已累日惠令人掩護試命綱紀斷之並辭惠乃使卒以弱竹彈兩燕旣而一去一留惠笑謂吏屬曰此留者自計爲巢功重彼去者旣

經楚痛理無固心羣下伏其深察人有負鹽負薪者同釋重擔息樹陰二人將行爭一羊皮各言藉背之物惠遣爭者出顧州綱紀曰此羊皮可拷知主乎羣下咸無答者惠令人置羊皮席上以杖擊之見少鹽屑曰得其實矣使爭者視之負薪者乃伏而就罪凡所察究多如此類由是吏人莫敢欺犯後爲開府儀同三司青州刺史王如故歷政有美績惠素爲文明太后所忌誣惠將南叛誅之惠二弟初樂與惠諸子同戮後妻梁氏亦死青州盡沒其家財惠本無覺故天下寃惜焉惠從弟鳳爲定州刺史安縣王長樂主簿後長樂以罪賜死時卜筮者河間邢瓚辭引鳳云長樂不軌鳳爲謀主伏誅唯鳳弟道念與鳳子及兄弟之子皆逃免後遇赦乃出太和十二年孝文將爵舅氏詔訪存者而惠諸從以再離孥戮難於應命唯道念敢先詣闕乃申后妹及鳳兄弟子女之存者於是賜鳳子屯爵柏人侯安祖浮陽侯興祖安喜侯道念貞定侯從弟寄生高邑子皆加將軍十五年安祖昆弟四人以外戚蒙見詔謂曰卿之先世內外有犯罪於時然官必用才以親非興邦之選外氏之寵超於末葉從今已後自非

奇才不得復外戚謬班抽舉既無殊能今且可還後例降爵安祖等改侯爲伯
並去軍號帝奉馮氏過厚於李氏過薄舅家了無敘用朝野人士所以竊議太
常高閩顯言于禁中及宣武寵隆外家並居顯位乃惟孝文舅氏存已不霑恩
澤景明末特詔與祖爲中山太守正始初詔追崇惠爲使持節驃騎將軍開府
儀同三司定州刺史中山公太常考行上言案諡法武而不遂曰壯諡曰壯公
與祖自中山遷燕州刺史卒以兄安祖子侃晞爲後襲先封南郡王後以庶姓
罷王改爲博陵郡公晞侃爲莊帝所親幸拜散騎常侍嘗食典御帝之圖尔朱
榮侃晞與魯安等持刃於禁內殺榮及莊帝豪塵侃晞奔梁

高肇字首文文昭皇太后之兄也自云本勃海裔人五世祖顧晉永嘉中避亂
入高麗父颺字法脩孝文初與弟乘信及其鄉人韓內冀富等入魏拜厲威將
軍河間子乘信明威將軍俱待以客禮遂納颺女是爲文昭皇后生宣武颺卒
景明初宣武追思舅氏徵肇兄弟等錄尙書事北海王詳等奏颺宜贈左光祿
大夫賜爵渤海公諡曰敬其妻蓋氏宜追封清河郡君詔可又詔颺嫡孫猛襲

渤海公爵封肇平原郡公肇弟顯澄城郡公三人同日受封始宣武末與舅氏相接將拜爵乃賜衣幘引見肇顯于華林都亭皆甚惶懼舉動失儀數日之間富貴赫奕是年咸陽王禧誅財物珍寶奴婢田宅多入高氏未幾肇爲尚書右僕射冀州大中正尚宣武姑高平公主遷尚書令肇出自夷土時望輕之及在位居要留心百揆孜孜無倦世咸謂之爲能宣武初六輔專政後以咸陽王禧無事構逆由是委肇肇旣無親族頗結朋黨附之者旬月超昇背之者陷以大罪以北海王詳位居其上構殺之又說宣武防衛諸王殆同囚禁時順皇后暴崩世議言肇爲之皇子昌薨僉謂王顯失於醫療承肇意旨及京兆王愉出爲冀州刺史畏肇恣擅遂至不軌肇又譖殺彭城王勰由是朝野側目咸畏惡之因此專權與奪任己又嘗與清河王懌於雲門外廡下忽忿諍大至紛紜太尉高陽王雍和止之高后旣立逾見寵信肇旣當衡軸每事任己本無學識動違禮度好改先朝舊制減削封秩抑黜勳人由是怨聲盈路矣延昌初遷司徒雖貴登台鼎猶以去要怏怏衆咸嗤笑之父兄封贈雖久竟不改瘞三年乃詔令

還葬肇不自臨赴唯遣其兄子猛改服詣代遷葬於鄉時人以肇無識哂而不責也及大舉征蜀以肇爲大將軍都督諸軍爲之節度與都督甄琛等二十餘人俱面辭宣武於東堂親奉規略是日肇所乘駿馬停於神獸門外無故驚倒轉臥渠中鞍具瓦解衆咸怪異肇出惡焉四年宣武崩赦罷征軍明帝與肇及征南將軍元遙等書稱諱言以告凶問肇承變非唯仰慕亦憂身禍朝夕悲泣至于羸悴將至宿瀝澗驛亭家人夜迎省之皆不相視直至闕下縗服號哭昇太極殿盡哀太尉高陽王先居西柏堂專決庶事與領軍于忠密欲除之潛備壯士直寢邢豹伊益生等十餘人於舍人省下肇哭梓宮訖於百官前引入西廊清河王懌任城王澄及諸王等皆竊言目之肇入省壯士搯而拉殺之下詔暴其罪惡稱爲自盡自餘親黨悉無追問削除職爵葬以士禮逮昏乃於廁門出其尸歸家初肇西征行至函谷車軸中折從者皆以爲不獲吉還也靈太后臨朝令特贈營州刺史永熙二年孝武帝贈使持節侍中中外諸軍事太師大丞相太尉公錄尚書事冀州刺史肇子植自中書侍郎爲濟州刺史率州軍討

破元愉別將有功當蒙封賞不受云家荷重恩爲國致効是其常節何足以膺
進陟之報懇惻發於至誠歷青相朔恆四州刺史卒植頰莅五州皆清能著稱
當時號爲良刺史贈安北將軍冀州刺史肇長兄琨早卒襲賜封渤海郡公贈
都督五州諸軍事鎮東大將軍冀州刺史詔其子猛嗣猛字豹兒尙長樂公主
卽宣武同母妹也拜駙馬都尉歷位中書令出爲雍州刺史有能名入爲殿中
尙書卒贈司空冀州刺史孝武帝時復贈太師大丞相錄尙書事公主無子猛
先在外有男不敢令主知臨終方言之年幾三十矣乃召爲喪主尋卒無後琨
弟偃字仲游太和十年卒正始中贈安東將軍都督青州刺史謚曰莊侯景明
四年宣武納其女爲貴嬪及于順皇后崩永平元年立爲皇后二年入坐奏封
后母王氏爲武邑郡君偃弟壽早卒壽弟卽肇也肇弟顯侍中高麗國大中正
早卒

胡國珍字世玉安定臨涇人也祖略姚興渤海公姚逵平北府諮議參軍父深
赫連屈丐給事黃門侍郎太武剋統萬深以降款之功賜爵武始侯後拜河州

刺史國珍少好學雅尚清儉太和十五年襲爵例降爲伯女以選入掖庭生明帝卽靈太后也孝明帝踐祚以國珍爲光祿大夫靈太后臨朝加侍中封安定郡公追崇國珍妻皇甫氏爲京兆郡君置守冢十戶尙書令任城王澄奏安定公宜出入禁中參諮大務詔屈公入決萬機尋進位中書監儀同三司侍中如故賜絹歲八百疋妻梁四百匹男女姊妹各有差國珍與太師高陽王雍太傅清河王懌太保廣平王懷入居門下同釐庶政詔依漢車千秋晉安平王故事給步挽一乘自掖門至于宣光殿得以出入并備几杖後與侍中崔光俱授帝經侍直禁中國珍上表陳刑政之宜詔皆施行延和初加國珍使持節都督雍州刺史驃騎大將軍開府靈太后以國珍年老不欲令其在外且欲示以方面之榮竟不行遷司徒公侍中如故就宅拜之靈太后明帝率百寮幸其第宴會極歡又追京兆郡君爲秦太上君太上君景明三年薨於洛陽於此十六年矣太后以太上君墳瘞卑局更增廣爲起塋域門闕碑表侍中崔光等奏按漢高祖母始謚曰昭靈夫人後爲昭靈后薄太后母曰靈文夫人皆置園邑三百家

長丞奉守今秦太上君未有尊諡陵寢孤立卽秦君名宜上終稱兼設掃衛以慰情典請上尊諡曰孝穆權置園邑三十戶立長丞奉守太后從之封國珍繼室梁氏爲趙平郡君元義妻拜爲女侍中封新平郡君又徙封馮翊君國珍子祥妻長安縣公主卽清河王懌女也國珍年雖篤老而雅敬佛法時事潔齋自禮拜至於出入侍從猶能跨馬據鞍神龜元年四月七日步從所建佛像發第至閭闔門四五里八日又立觀像晚乃肯坐勞熱增甚因遂寢疾靈太后親侍藥膳十二日薨年八十給東園溫明祕器五時朝服各一具衣一襲贈布五千匹錢一百萬蠟千斤大鴻臚持節監護喪事太后還宮成服於九龍殿遂居九龍寢室明帝服小功服舉哀於太極東堂又詔自始薨至七七皆爲設千僧齋齋令七人出家百日設萬人齋二十七人出家先是巫覡言將有凶勸令爲厭勝法國珍拒而不從云吉凶有定分唯脩德以禳之臨死與太后訣云母子善臨天下殷勤至於再三又及其子祥云我唯有一子死後勿如比來威抑之靈太后以其好戲時加威訓國珍故以爲言始國珍欲就祖父西葬舊鄉後緣前世

諸胡多在洛葬有終洛之心崔光嘗對太后前問國珍國公萬年後爲在此安厝爲歸長安國珍言當陪葬天子山陵及病危太后請以後事竟言還安定語遂愔忽太后問清河王懌與崔光等議去留懌等皆以病亂請從光言太后猶記崔光昔與國珍言遂營墓於洛陽太后雖外從衆議而深追臨終之語云我公之遠慕二親亦吾之思父母也追崇假黃鉞使持節侍中相國都督中外諸軍事太師領太尉公司州牧號太上秦公加九錫葬以殊禮給九旒轡輅武賁班劍百人前後部羽葆鼓吹輜輶車諡曰文宣公賜物三千段粟一千五百石又詔贈國珍祖父父兄下逮從子皆有封職持節就安定監護喪事靈太后迎太上君神柩還第與國珍俱葬贈祿一與國珍同及國珍神主入廟詔太常權給以軒縣之樂六佾之舞初國珍無男養兄真子僧洗爲後後納趙平君生子祥字元吉襲封故事世襲例皆減邑唯祥獨得全封趙平君薨給東園祕器明帝服小功服舉哀于東堂靈太后服齊衰期葬於太上君墓左不得祔合祥歷位殿中尚書中書監侍中改封平涼郡公薨贈開府儀同三司雍州刺史諡曰

孝景僧洗字湛輝封爰德縣公位中書監侍中改封濮陽郡公僧洗自永安後廢棄不預朝政天平四年薨詔給東園祕器贈太師太尉公錄尚書事雍州刺史諡曰孝真長子寧字惠歸襲國珍先爵改爲臨涇伯後進爲公歷岐涇二州刺史卒諡曰孝穆女爲清河王亶妃生孝靜皇帝武定初贈太師太尉公錄尚書事諡曰孝昭子虔字僧敬元義之廢靈太后虔時爲千牛備身與備身張車渠等謀義事發義殺車渠等虔坐遠徙靈太后反政徵爲吏部郎中太后好以家人禮與親族宴戲虔常致諫由是後宴譴多不預焉出爲涇州刺史封安陽縣侯興和三年以帝元舅超遷司空公薨贈太傅太尉公尚書僕射徐州刺史諡曰宣葬日百官會葬乘輿送於郭外子長粲長粲仕齊累遷章武太守爲政清靜頗得人和除兼并省尚書左丞當官正色無所回避尚書左僕射趙彥深密勿樞要中書舍人裴澤便蕃左右以殿門受拜皆彈紉之彥深等頗有恨言長粲不以介意後主踐祚長粲被敕與黃門馮子琮出入禁中專典敷奏武成還鄴後主在晉陽長粲仍受委留後後主從武成還鄴仍敕在京省判度支尚

書監議五禮武成崩與領軍奠定遠錄尚書趙彥深左僕射和士開高文遙領軍綦連猛高阿那肱右僕射唐邕同知朝政時人號爲八貴於後定遠文遙並出唐邕專典外兵綦連猛高阿那肱別總武任長粲常在左右兼宣詔令從幸晉陽後主旣富於春秋庶事皆相歸委長粲盡心毗奉甚得名譽又正爲侍中丁母憂給假馳驛奔喪尋有詔起復前任隴東王長仁心欲入處機要之地爲執政不許長仁疑長粲通謀大以爲恨言於太后發其陰私請出爲州太后爲言於後主不獲已從焉除趙州刺史及辭眷戀流涕後主亦憫然慰勉之至州存心政事爲人吏所懷因沐髮手不得舉失瘖卒於州後主聞而傷悼在朝文武嗟嘆咸惜之贈司空尚書左僕射瀛州刺史諡文貞公長粲性溫雅在官清潔但始居要密便爲子叔泉取清河王崔德儉女爲妻在晉陽處分用妻弟王逖與德儉對爲司徒主簿時論以此譏之又性好內有一侍婢其妻王驕妬手刺殺之爲此忿恨數年不相見親表爲之語曰自我不見于今三年後納妾李氏仍與王氏別宅亦無朝拜之禮嫠婦公孫氏也已殺三夫長粲不信彊取

之令與李氏同住未期而亡子仲操位陳留太守次叔泉通直散騎侍郎先是望氣者上言太白食昴法當大赦和士開奏聞詔降罪人以應之尙書左僕射徐之才諳練往事語士開曰天垂象見吉凶有成災者有不成災者案昴趙分或云趙地有災古者王侯各在封邑故分野有災當其君長今吾等虛名竟不之國刺史專令一境善惡所歸比來多以刺史爲驗未幾而長粲死焉寧弟盛字歸興位左衛將軍賜爵江陽男歷幽瀛二州刺史爲政清靜人吏愛之轉冀州刺史卒贈司徒公錄尙書事定州刺史追封陽平郡公諡曰懿穆明帝後納其女爲皇太后舅皇甫集妻字元會一字文都安定朝邠人封涇陽縣公位儀同三司雍州刺史右衛大將軍贈侍中司空公諡曰靜集弟度字文亮封安縣公累遷尙書左僕射領左衛將軍度頑蔽每與人言自稱僕射時人方之毛嘉正光初元義出之爲都督瀛州刺史度不願出頻表固辭乃除右光祿大夫孝昌元年爲司空領軍將軍加侍中元義之見出也恐朝夕誅滅度與妻陳氏多納其貨爲之左右度無子養兄集子子熙爲子子熙嫂趙郡太守裴他女他還

京師度問他外何消息他曰行路所聞唯道明公多取元义金帛遠近無不慨歎公宜戮此罪人以謝天下陳氏聞而惡之又攝吏部事遷司徒兼尙書令不拜尋轉太尉孜孜營利老而彌甚遷授之際皆自請乞靈太后知其無用以舅氏難違之然所歷官最爲貪蠹尔朱榮入洛西奔兄子華州刺史邕尋與邕爲人所殺

楊騰弘農人文帝之舅也父貴琅邪郡守封華陰男騰妹爲京兆王愉妃故騰得處貴游景明初襲爵後爲襄城太守甚有聲稱文帝卽位位開府儀同三司出鎮河東薨贈司空雍州刺史諡曰貞襄子威

乙弗繪河南洛陽人文帝皇后之兄也文帝卽位位開府儀同三司侍中中書監魏昌縣公又爲吏部尙書

趙猛太安狄邠人也姊爲齊文穆皇后繼室生趙郡公琛猛性方直頗有器幹齊神武舉義以預義勳封信都縣伯累遷南營州刺史卒贈司空公

胡長仁字孝隆安定臨涇人齊武成皇后長兄也父延之魏中書令兗州刺史

大寧中贈司空公長仁以內戚歷位尙書左僕射尙書令及武成崩預參朝政封隴東郡王左丞酈孝裕郎中陸仁惠盧元亮厚相結託長仁每上省孝裕必方駕而來省務旣繁簿案堆積令使欲諮都坐者日有百數孝裕屏人私話朝退亦相隨仁惠元亮又伺閑而往停斷公事人號爲三佞長仁私遊及密處處追尋孝裕勸其求進和士開深疾之於是奏除孝裕爲章武郡守元亮爲淮南郡守仁惠爲幽州長史孝裕又說長仁曰王陽臥疾和士開必來因而殺之入見太后不過百日失官便代其處士開知其謀更徙孝裕爲北營州建德郡守長仁每干執事求爲領軍將相文武以主上富於春秋母后家不可專政故抑而不許以本官攝選長仁性好威福意猶未盡先是尙書胡長粲奏事內省長仁疑粲間已苦請太后出之天統五年從駕自并還鄴夜發隘口帝以夜漏尙早停於路傍長仁後來謂是從行諸貴遂遣門客程牙馳騎呼問帝遣中尙食陳德信問是何人牙不答而走帝命左右追射之旣而捉獲因令壯士撲之決馬鞭二百牙一宿便死士開因此遂令德信列長仁倚親驕豪無畏憚由是除

齊州刺史及辭於昭陽列仗引見長仁不敢發語唯泣涕橫流到任啓求暫歸所司不爲奏怨憤謀令冀州人李楷牆刺和士開其弟長咸告之士開密與祖孝徵議之孝徵引漢文帝殺薄昭爲故事於是敕遣張固劉桃枝馳驛詣齊州責長仁謀害宰輔遂賜死先是太白食昴占者曰昴爲趙分不利胡王長仁未幾死長仁性好歌舞飲酒至數斗不亂自至齊州每進酒後必長歎歛歔流涕不自勝左右莫不怪之尋而後主納長仁女爲后重加贈長仁子君璧襲爵隴東王君璧弟君璋及長仁弟長雍等前後七人並賜爵合門貴戚后廢後稍稍黜退焉

隋文帝外家呂氏其族蓋微平齊後求訪不知所在開皇初濟南郡上言有男子呂永吉自稱有姑字苦桃嫁爲楊諱妻勤驗知是舅子始追贈外祖雙周爲上柱國太尉八州諸軍事青州刺史封齊郡公諡曰敬外祖母姚氏爲齊敬公夫人詔並改葬於齊州立廟置守冢十家以永吉襲爵留在京師及大業中授上黨郡太守性識庸劣職務不理後去官不知所終從父道貴性尤頑駭言詞

鄙陋初自鄉里徵入長安上見之悲泣道貴略無感容但連呼帝名云種未定不可偷大似苦桃姊後數犯忌諱動致違忤上甚恥之乃命高頴厚加供給不許接對朝士拜上儀同三司出爲濟南太守令卽之任斷其入朝道貴還至本郡高自崇重每與人言自稱皇舅數將儀衛出入閭里從故人游宴庶僚咸苦之後郡廢終於家子孫無聞焉

論曰三五哲王防深慮遠舅甥之國罕執鈞衡母后之家無聞傾敗爰及漢晉顛覆繼軌皆由乎進不以禮故其斃亦速自魏至隋時移四代得失之迹斯文可睹苟不傾宗終致亡國周隋之際可爲鑒焉若使開皇創業不取懲於已往獨孤權侔呂霍必敗於仁壽之前蕭氏勢均梁竇豈全於大業之後今或不隕舊基或更隆先構豈非處之以道遠權之所致乎

北史卷八十

北

史
卷八十
列傳

十五
中華書局聚

...

...

...

...

...

...

...

...

...

...

...

...

...

...

...

...

...

北史卷八十考證

閻毗傳以賊汗欺妄徵斬於京師○汗監本訛汗今改正

馮熙傳征西大將軍南平王○王監本訛土今改從魏書

李惠傳時卜筮者河間邢瓚辭引鳳○卜監本訛十今改正

史臣論得失之迹斯文可睹○睹監本訛睹今改正

北史卷八十考證

北史卷八十一

唐

李

延

壽

撰

列傳第六十九

儒林上

梁越

盧醜

張偉

梁祚

平恆

陳奇

劉獻之

張吾貴

劉蘭

孫惠蔚

族曾孫靈暉
石曜靈暉子馬子結

徐遵明

董徵

李業興

子崇祖

李鉉

馮偉

張買奴

劉軌思

鮑季詳

邢峙

劉晝

馬敬德

子元熙

張景仁

權會

張思伯

張彫武

郭遵

儒者其為教也大矣其利物也博矣以篤父子以正君臣開政化之本原鑿生靈之耳目百王損益一以貫之雖世或汗隆而斯文不墜自永嘉之後宇內分

崩禮樂文章掃地將盡魏道武初定中原雖日不暇給始建都邑便以經術爲先立太學置五經博士生員千有餘人天興二年春增國子太學生員至三千人豈不以天下可馬上取之不可以馬上臨之聖達經猷蓋爲遠矣四年春命樂師入學習舞釋菜于先師明元時改國子爲中書學立教授博士太武始光三年春起太學於城東後徵盧玄高允等而令州郡各舉才學於是人多砥尚儒術轉興獻文天安初詔立鄉學郡置博士二人助教二人學生六十人後詔大郡立博士二人助教四人學生一百人次郡立博士二人助教二人學生八十人中郡立博士一人助教二人學生六十人下郡立博士一人助教一人學生四十人太和中改中書學爲國子學建明堂辟雍尊三老五更又開皇子之學及遷都洛邑詔立國子太學四門小學孝文欽明稽古篤好墳籍坐輿據鞍不忘講道劉芳李彪諸人以經書進崔光邢巒之徒以文史達其餘涉獵典章閑集詞翰莫不縻以好爵動貽賞眷於是斯文鬱然比隆周漢宣武時復詔營國學樹小學於四門大選儒生以爲小學博士員四十人雖鬻宇未立而經術

彌顯時天下承平學業大盛故燕齊趙魏之間橫經著錄不可勝數大者千餘人小者猶數百州舉茂異郡貢孝廉對揚王庭每年逾衆神龜中將立國學詔以三品以上及五品清官之子以充上選未及簡置仍復停寢正光三年乃釋奠於國學命祭酒崔光講孝經始置國子生三十六人暨孝昌之後海內淆亂四方校學所存無幾齊神武生於邊朔長於戎馬杖義建旗掃清區縣因魏氏喪亂屬尔朱殘酷文章咸盪禮樂同奔弦歌之音且絕俎豆之容將盡永熙中孝武復釋奠於國學又於顯陽殿詔祭酒劉廡講孝經黃門李郁說禮記中書舍人盧景宣講大戴禮夏小正篇復置生七十二人及永熙西遷天平北徙雖庠序之制有所未遑而儒雅之道遽形心慮時初遷都於鄴國子置士三十六人至興和武定之間儒業復盛矣始天平中范陽盧景裕同從兄仲禮於本郡起逆齊神武免其罪置之賓館以經教授太原公以下及景裕卒又以趙郡李同軌繼之二賢並大蒙恩遇待以殊禮同軌云亡復徵中山張彫武勃海李鉉刁柔中山石曜等遞爲諸子師友及天保大寧武平之朝亦引進名儒授皇太

子諸王經術然爰自始基暨於季世唯濟南之在儲宮性識聰敏頗自砥礪以成其美自餘多驕恣傲狠動違禮度日就月將無聞焉爾鏤冰彫朽迄用無成蓋有由焉夫帝王子孫習性驕逸況義方之情不篤邪僻之路競開自非得自生知體包上智而內縱聲色之娛外多犬馬之好安能入則篤行出則友賢者也徒有師傅之資終無琢磨之實貴游之輩飾以明經可謂稽山竹箭加之括羽俯拾青紫斷可知焉而齊氏司存或失其守師保凝丞皆賞勳舊國學博士徒有虛名唯國子一學生徒數十人耳胄子以通經進仕者唯博陵崔子發廣平宋游卿而已自外莫見其人幸朝章寬簡政綱疎闊游手浮惰十室而九故橫經受業之侶徧於鄉邑負笈從宦之徒不遠千里入閭里之內乞食爲資憇桑梓之陰動逾十數燕趙之俗此衆尤甚焉齊制諸郡並立學置博士助教授經學生俱差逼充員士流及豪富之家皆不從調備員旣非所好墳籍固不關懷又多被州郡官人驅使縱有游惰亦不檢察皆由上非所好之所致也諸郡俱得察孝廉其博士助教及游學之徒通經者推擇充舉射策十條通八以上

聽九品出身其尤異者亦蒙抽擢周文受命雅重經典于時西都板蕩戎馬生
郊先王之舊章往聖之遺訓掃地盡矣於是求闕文於三古得至理於千載黜
魏晉之制度復姬旦之茂典盧景宣學通羣藝修五禮之缺長孫紹遠才稱洽
聞正六樂之壞由是朝章漸備學者嚮風明皇纂歷敦尚學藝內有崇文之觀
外重成均之職握素懷鉛重席解頤之士間出於朝廷員冠方領執經負笈之
生著錄於京邑濟濟焉足以踰於向時矣洎保定三年帝乃下詔尊太保燕公
爲三老帝於是服袞冕乘碧輅陳文物備禮容清蹕而臨太學袒割以食之奉
觴以醕之斯固一世之盛事也其後命輶軒而致玉帛徵沈重於南荆及定山
東降至尊而勞萬乘待熊安生以殊禮是以天下慕嚮文教遠覃衣儒者之服
挾先王之道開黌舍延學徒者比肩勵從師之志守專門之業辭親戚甘勤苦
者成市雖通儒盛業不逮晉魏之臣而風移俗變抑亦近代之美也自正朔不
一將三百年師訓紛綸無所取正隋文膺期纂曆平一寰宇頓天網以掩之賁
旌帛以禮之設好爵以縻之於是四海九州強學待問之士靡不畢集焉天子

乃整萬乘率百僚遵問道之儀觀釋奠之禮博士罄縣河之辯侍中竭重席之
奧考正亡逸研覈異同積滯羣疑渙然冰釋於是超擢奇雋厚賞諸儒京邑達
乎四方皆啓黌校齊魯趙魏學者尤多負笈追師不遠千里講誦之聲道路不
絕中州之盛自漢魏以來一時而已及帝暮年精華稍竭不悅儒術專尚刑名
執政之徒咸非篤好暨仁壽間遂廢天下之學唯存國子一所弟子七十二人
煬帝卽位復開庠序國子郡縣之學盛於開皇之初徵辟儒生遠近畢至使相
與講論得失於東都之下納言定其差次一以聞奏焉于時舊儒多已凋亡惟
信都劉士元河間劉光伯拔萃出類學通南北博極今古後生鑽仰所製諸經
議疏搢紳咸師宗之旣而外事四夷戎馬不息師徒怠散盜賊羣起禮義不足
以防君子刑罰不足以威小人空有建學之名而無弘道之實其風漸墜以至
滅亡方領矩步之徒亦轉死溝壑凡有經籍因此湮沒於煨燼矣遂使後進之
士不復聞詩書之言皆懷攘竊之心相與陷於不義傳曰學者將殖不學者將
落然則盛衰是繫興亡攸在有國有家者可不慎歟漢世鄭玄並爲衆經注解

服虔何休各有所說玄易詩書禮論語孝經虔左氏春秋休公羊傳大行於河
北王肅易亦間行焉晉世杜預注左氏預玄孫坦坦弟驥於宋朝並爲青州刺
史傳其家業故齊地多習之自魏末大儒徐遵明門卜講鄭玄所注周易遵明
以傳盧景裕及清河崔瑾景裕傳權會郭茂權會早入鄴都郭茂恆在門下教
授其後能言易者多出郭茂之門河南及青齊之間儒生多講王輔嗣所注師
訓蓋寡齊時儒士罕傳尚書之業徐遵明兼通之遵明受業於屯留王聰傳授
浮陽李周仁及渤海張文敬李鉉河間權會並鄭康成所注非古文也下里諸
生略不見孔氏注解武平末劉光伯劉士元始得費魁義疏乃留意焉其詩禮
春秋尤爲當時所尚諸生多兼通之三禮並出遵明之門徐傳業於李鉉祖儁
田元鳳馮偉紀顯敬呂黃龍夏懷敬李鉉又傳授刁柔張買奴鮑季詳邢峙劉
晝熊安生安生又傳孫靈暉郭仲堅丁特德其後生能通禮經者多是安生門
人諸生盡通小戴禮於周儀禮兼通者十二三焉通毛詩者多出於魏朝劉獻
之獻之傳李周仁周仁傳董令度程歸則歸則傳劉敬和張思伯劉軌思其後

能言詩者多出二劉之門河北諸儒能通春秋者並服子慎所注亦出徐生之門張買奴馬敬德邢峙張思伯張奉禮張彫劉晝鮑長宣王元則並得服氏之精微又有衛覬陳達潘叔虔雖不傳徐氏之門亦爲通解又有姚文安秦道靜初亦學服氏後兼更講杜元凱所注其河外儒生俱伏膺杜氏其公羊穀梁二傳儒者多不厝懷論語孝經諸學徒莫不通講諸儒如權會李欽刁柔熊安生劉軌思馬敬德之徒多自出義疏雖曰專門亦皆相祖習也大抵南北所爲章句好尚互有不同江左周易則王輔嗣尚書則孔安國左傳則杜元凱河洛左傳則服子慎尚書周易則鄭康成詩則並主於毛公禮則同遵於鄭氏南人約簡得其英華北學深蕪窮其枝葉考其終始要其會歸其立身成名殊方同致矣自魏梁越已下傳授講議者甚衆今各依時代而次以備儒林云爾

梁越字玄覽新興人也博通經傳性純和魏初爲禮經博士道武以其謹厚遷上大夫令授諸皇子經書明元初以師傅恩賜爵祝阿侯出爲雁門太守獲白雀以獻拜光祿大夫卒

盧醜昌黎徒何人也襄城王魯元之族也太武監國醜以博學入授經後以師傳舊恩賜爵濟陰公位尚書加散騎常侍卒於河內太守

張偉字仲業太原中都人也學通諸經鄉里受業者常數百人儒謹汎納雖有頑固問至數十偉告喻殷勤曾無愠色常依附經典教以孝悌門人感其仁化事之如父性清雅非法不言太武時與高允等俱被辟命授中書博士累遷爲中書侍郎本國大中正使酒泉慰勞沮渠無諱又使宋賜爵成臯子出爲營州刺史進爵建安公卒贈并州刺史諡曰康

梁祚北地泥陽人也父邵皇始二年歸魏位濟陰太守至祚居趙郡祚篤志好學歷習經典尤善公羊春秋鄭氏易常以教授有儒者風而無當世之才與幽州別駕平恆有舊恆時請與論經史辟祕書中散稍遷祕書令爲李訢所排擯退爲中書博士後出爲統萬鎮司馬徵爲散令撰并陳壽三國志名曰國統又作代都賦頗行於世清貧守素不交勢貴卒子元吉有父風

平恆字繼叔燕郡薊人也祖視父儒並仕慕容爲通宦恆耽勤讀誦多通博聞

自周以降暨於魏世帝王傳代之由貴臣升降之緒皆撰品第商略是非號曰略注合百餘篇安貧樂道不以屢空改操徵爲中書博士久之出爲幽州別駕廉貞寡欲不營資產衣食常至不足妻子不免饑寒後遷祕書丞時高允爲監河間邢祐北平陽蝦河東裴宗廣平程駿金城趙元順等爲著作郎允每稱博通經籍無過恆也恆三子並不率父業好酒自棄恆常忿其世衰植杖巡舍側崗而哭不爲營事婚宦任意官娶曰此輩曾是衰頓何煩勞我故仕娉濁碎不得及其門流別構精廬并置經籍於中一奴自給妻子莫得而往酒食亦不與同時有珍美呼時老東安公一雍等共飲噉之家人無得嘗焉太和十年以恆爲祕書令而固請爲郡未受而卒贈幽州刺史都昌侯諡曰康

陳奇字脩奇河北人也少孤貧而奉母至孝齟齬聰識有夙成之美愛玩經典常非馬融鄭玄解經失旨志在著述五經始注孝經論語頗傳於世爲搢紳所稱與河間邢祐同召赴京時祕書省遊雅素聞其名始頗好之引入祕省欲授以史職後與奇論典故至易訟卦天與水違行雅曰自葱嶺以西水皆西流推

此而言自葱嶺西豈東向望天哉雅性護短因以爲嫌嘗衆辱奇或爾汝之或指爲小人奇曰公身爲君子奇身且小人雅曰君言身且小人君祖父是何人也奇曰祖燕東部侯釐雅質奇曰侯釐何官也奇曰昔有雲師火正鳥師之名以斯而言世革則官異時易則禮變公爲皇魏東宮內侍長竟何職也先是敕以奇付雅令銓補祕書雅旣惡之遂不復敘用焉奇冗散數年高允每嘉其遠致稱奇通識非凡學所及允微勸雅曰吾朝望具瞻何爲與野儒辯簡牘章句雅謂允有私於奇曰君寧黨小人也乃取奇注論語孝經燒於庭內奇曰公貴人不乏樵薪何乃然奇論語雅愈怒因告京師後生不聽傳授而奇無降志亦評雅之失雅製昭皇太后碑文論后名字之美比諭前魏之甄后奇刺發其非遂聞於上詔下司徒檢對雅有屈焉有人爲謗書多怨時之言頗稱奇不得志雅乃諷在事云此書言奇不遂當是奇假人爲之如依律文造謗書者皆及孥戮遂抵奇罪時司徒平原王陸麗知奇見枉惜其才學故得遷延經年冀得寬宥獄成竟致大戮遂及其家奇於易尤長在獄嘗自筮卦未及成乃擊破而歎

曰吾不度來年冬季及奇受害如其所占奇初被召夜夢星墜壓脚明而告人曰星則如風星則好雨夢星壓脚必無善徵但時命峻切不敢不赴耳奇外生常矯之仕歷郡守奇所注論語矯之傳掌未能行於世其義多異鄭玄往往與司徒崔浩同

劉獻之博陵饒陽人也少而孤貧雅好詩傳曾受業於渤海程玄後遂博觀衆籍見名法之言掩卷而笑曰若使楊墨之流不爲此書千載誰知其小也曾謂其所親曰觀屈原離騷之作自是狂人死其宜矣孔子曰無可無不可實獲我心時人有從獻之學者獻之輒謂之曰人之立身雖百行殊塗準之四科要以德行爲首子若能入孝出悌忠信仁讓不待出戶天下自知儻不能然雖復不立身之道有何益乎孔門之徒初亦未悟見臯魚之歎方乃歸而養親嗟乎先達何自覺之晚也由是四方學者莫不高其行義希造其門獻之善春秋毛詩每講左氏盡隱公八年便止云義例已了不復講解由是弟子不能究竟其說後本郡逼舉孝廉至京稱疾而還孝文幸中山詔徵典內校書獻之喟然歎曰

吾不如莊周散木遠矣一之謂甚其可再乎固以疾辭時中山張吾貴與獻之齊名四海皆稱儒宗吾貴每一講唱門徒千數其行業可稱者寡獻之著錄數百而已皆通經之士於是有識者辯其優劣魏承喪亂之後五經大義雖有師說而海內諸生多有疑滯咸決於獻之六藝之文雖不悉注所標宗旨頗異舊義撰三禮大義四卷三傳略例三卷注毛詩序義一卷行於世并立章句疏二卷注涅槃經未就而卒四子放古爰古參古修古

張吾貴字吳子中山人也少聰慧口辯身長八尺容貌奇偉年十八本郡舉爲太學博士吾貴先未多學乃從酈詮受禮牛天祐受易詮祐粗爲開發而已吾貴覽讀一遍便卽別構戶牖世人競歸之曾在夏學聚徒千數而不講傳生徒竊云張生之於左氏似不能說吾貴聞之謂曰我今夏講暫罷後當說傳君等來日皆當持本生徒怪之而已吾貴詣劉蘭蘭遂爲講傳三旬之中吾貴兼讀杜服隱括兩家異同悉舉諸生後集便爲講之義例無窮皆多新異蘭仍伏聽學者以此益奇之而辯能飾非好爲詭說由是業不久傳而氣陵牧守不屈王

侯竟不仕而終

劉蘭武邑人也年三十餘始入小學書急就篇家人覺其聰敏遂令從師受春秋詩禮於中山王保安家貧無以自資且耕且學三年之後便白其兄求講說其兄笑而聽之爲立爨舍聚徒二百蘭讀左氏五日一遍兼通五經先是張吾貴以聰辯過人其所解說不本先儒之旨唯蘭推經傳之由本注者之意參以緯候及先儒舊事甚爲精悉自後經義審博皆由於蘭蘭又明陰陽博物多識故爲儒者所宗瀛州刺史裴植徵蘭講書於州南館植爲學主故生徒甚盛海內稱焉又特爲中山王英所重英引在館令授其子熙誘略等蘭學徒前後數千成業者衆而排毀公羊又非董仲舒由是見譏於世爲國子助教靜坐讀書有人叩門蘭命引入葛巾單衣入與蘭坐謂曰君自是學士何爲每見毀辱理義長短竟在誰而過無禮見陵也今欲相召當與君正之言終而出蘭少時患死

孫惠蔚武邑武遂人也年十五粗通詩書及孝經論語十八師董道季講易十

九師程玄讀禮經及春秋三傳周流儒肆有名於冀方太和初郡舉孝廉對策於中書省時中書監高閭因相談薦俄爲中書博士轉皇宗博士閭被敕理定雅樂惠蔚參其事及樂成閭上疏請集朝士於太樂共研是非祕書令李彪自以才辯立難於其前閭命惠蔚與彪抗論彪不能屈黃門侍郎張彝常與游處每表疏論事多參訪焉十七年孝文南征上議告類之禮及太師馮熙薨惠蔚監其喪禮上書令熙未冠之子皆服成人服惠蔚與李彪以儒學相知及彪位至尙書惠蔚仍太廟令孝文曾從容言曰道固旣登龍門而孫蔚猶沉涓澮朕常以爲負矣雖久滯小官深體通塞無孜孜之望儒者以是尙焉二十二年侍讀東宮先是七廟以平文爲太祖孝文議定祖宗以道武爲太祖祖宗雖定然昭穆未改及孝文崩將祔神主於廟侍中崔光兼太常卿以太祖旣改昭穆以次而易兼御史中尉黃門侍郎邢巒以爲太祖雖改昭穆仍不應易乃立彈草欲按奏光光謂惠蔚曰此乃禮也而執法欲見彈劾思獲助於碩學惠蔚曰此深得禮變尋爲書以與光讚明其事光以惠蔚書呈宰輔乃召惠蔚與巒庭議

得失尙書令王肅又助繼而繼理終屈彈事遂寢宣武卽位之後仍在左右敷
訓經典自冗從僕射遷祕書丞武邑郡中正惠蔚旣入東觀見典籍未周及閱
舊典先無定目新故雜糅首尾不全有者累表數十無者曠年不寫或篇第褻
落始末淪殘或文壞字誤謬爛相屬卷目雖多全定者少請依前丞盧昶所撰
甲乙新錄欲裨殘補闕損併有無校練句讀以爲定本次第均寫永爲常式其
省先無本者廣加推尋搜求令足然經記浩博諸子紛綸部帙旣多章第紕繆
當非一二校書歲月可了求令四門博士及在京儒生四十四人在祕書省專精
校考參定字義詔許之後爲黃門侍郎代崔光爲著作郎才非文史無所撰著
遷國子祭酒祕書監仍知史事延昌二年追賞講定之勞封棗強縣男明帝初
出爲濟州刺史還京除光祿大夫魏初已來儒生寒官惠蔚最爲顯達先單名
蔚正始中侍講禁內夜論佛經有愜帝旨詔使加惠號惠蔚法師焉卒于官贈
瀛州刺史諡曰戴子伯禮襲封伯禮善隸書位國子博士惠蔚族曾孫靈暉
靈暉少明敏有器度得惠蔚手錄章疏研精尋問更求師友三禮三傳皆通宗

旨然始就鮑季詳熊安生質問疑滯其所發明熊鮑無以異也舉冀州秀才射策高第仕齊累至國子博士授南陽王綽府諮議參軍綽除定州刺史仍隨綽之鎮所爲猖蹶靈暉唯默默憂綽不能諫止綽表請靈暉爲王師以管記馬子結爲諮議朝廷以王師三品奏啓不合後主於啓下手詔云但用之儒者甚以爲榮綽除大將軍靈暉以王師領大將軍司馬綽誅停廢從綽死後每至七日至百日靈暉恆爲綽請僧設齋行道齊亡卒馬子結者其先扶風人世仕涼土魏太和中入洛父祖俱清官子結及兄子廉子尙三人皆涉文學陽休之牧西兗子廉子尙子結與諸朝士各有贈詩陽總爲一篇酬答詩云三馬皆白眉者也子結爲南陽王綽管記隨綽定州綽每出游獵必令子結走馬從禽子結旣儒緩衣垂帽落或叫或啼令騎驅之非墜馬不止綽以爲笑由是漸見親狎啓爲諮議焉石曜字白曜中山安善人亦以儒學進居官清儉武平中爲黎陽郡守時丞相咸陽王世子斛律武都出爲兗州刺史史性貪暴先過衛縣令丞以下斂絹數千疋遺之至黎陽令左右諷動曜及縣官曜手持一絹謂武都曰此是

老石機杼聊以奉贈自此以外並須出於吏人吏人之物一毫不敢輒犯武都亦知矐清素純儒笑而不責矐著石子十卷言甚淺俗位終譙州刺史靈暉子萬壽字仙期一字遐年聰識機警博涉經史善屬文美談笑在齊仕爲陽休之開府行參軍及隋文帝受禪滕穆王引爲文學坐衣冠不整配防江南行軍總管宇文述召典軍書萬壽本自書生從容文雅一旦從軍鬱鬱不得志爲五言詩贈京邑知友詩至京盛爲當時吟誦天下好事者多書壁上而翫之後歸鄉里十餘年不得調仁壽初拜豫章王長史非其好也王轉封于齊卽爲齊王文學當時諸王官屬多被夷滅由是彌不自安因謝病免久之授大理司直卒於官有集十卷行於世

徐遵明字子判華陰人也幼孤好學年十七隨鄉人毛靈和等詣山東求學至上黨乃師屯留王聰受毛詩尚書禮記一年便辭聰游燕趙師事張吾貴吾貴門徒甚盛遵明伏膺數月乃私謂友人曰張生名高而義無檢格凡所講說不恆吾心請更從師遂與平原田猛略就范陽孫買德受業一年復欲去之猛略

謂遵明日君年少從師每不終業如此用意終恐無成遵明乃指其心曰吾今知真師所在矣正在如此乃詣平原唐遷居於蠶舍讀孝經論語毛詩尚書三禮不出門院凡經六年時彈箏吹笛以自娛慰又知陽平館陶趙世業家有服氏春秋是晉世永嘉舊寫遵明乃往讀之復經數載因手撰春秋義章爲三十卷是後教授門徒每臨講坐先持執疏然後敷講學徒至今浸以成俗遵明講學於外二十餘年海內莫不宗仰頗好聚斂與劉獻之張吾貴皆河北聚徒教授懸納絲粟留衣物以待之名曰影質有損儒者之風遵明見鄭玄論語序云書以八寸策誤作八十宗因曲爲之說其僻也皆如此獻之吾貴又甚焉遵明不好京輦以兗州有舊因徙屬焉元顥入洛任城太守李湛將舉義兵遵明同其事夜至人間爲亂兵所害永熙二年遵明弟子通直散騎侍郎李業興表求加策命卒無贈諡

董徵字文發頓丘衛國人也身長七尺二寸好古學尚雅素年十七師清河監伯陽受論語毛詩春秋周易河內高望崇受周官後於博陵劉獻之遍受諸經

數年之中大義精練講授生徒太和末爲四門小學博士後宣武詔徵入旋華宮令孫惠蔚問以六經仍詔徵教授京兆清河廣平汝南四王後累遷安州刺史徵因述職路次過家置酒高會大享邑老乃言曰腰龜返國昔人稱榮仗節還家云胡不樂因誠二三子弟曰此之富貴匪自天降乃勤學所致耳時人榮之入爲司農少卿光祿大夫後以老解職永熙二年卒孝武帝以徵昔授學業故優贈儀同三司尚書左僕射相州刺史諡曰文烈子仲曜

李業興上黨長子人也祖蚪父玄紀並以儒學舉孝廉玄紀卒於金鄉令業興少耿介志學晚乃師事徐遵明於趙魏之間時有漁陽鮮于靈馥亦聚徒教授而遵明聲譽未高著錄尙寡業興乃詣靈馥覺舍類受業者靈馥乃謂曰李生久逐羌博士何所得也業興默爾不言及靈馥說左傳業興問其大義數條靈馥不能對於是振衣而起曰羌弟子正如此耳遂便徑還自此靈馥生徒傾學而就遵明學徒大盛業興之爲也後乃博涉百家圖緯風角天文占候無不討練尤長算歷雖在貧賤常自矜負若禮待不足縱於權貴不爲之屈後爲王遵

業門客舉孝廉爲校書郎以世行趙匪曆節氣後辰下算延昌中業與乃爲戊子元曆上之于時屯騎校尉張洪盪寇將軍張龍詳等九家各獻新曆宣武詔令共爲一曆洪等後遂共推業與爲主成戊子曆正光三年奏行之業與以殷曆甲寅黃帝辛卯徒有積元術數亡缺又修之各爲一卷傳於世建義初敕典儀注未幾除著作郎永安三年以前造曆之勳賜爵長子伯後以孝武帝登極之初豫行禮事封屯留縣子除通直散騎常侍永熙三年二月孝武帝釋奠業與與魏季景溫子昇竇瑗爲摘句後入爲侍讀遷鄴之始起部郎中辛術奏今皇居徙御百度扞始營構一興必宜中制李業與碩學通儒博聞多識萬門千戶所宜詢訪今求就之披圖案記考定是非參古雜今折中爲制詔從之於時尚書右僕射營構大匠高隆之被詔繕修三署樂器衣服及百戲之屬乃奏請業與共事天平四年與兼散騎常侍李諧兼吏部郎盧元明使梁梁散騎常侍朱异問業與曰魏洛中委粟山是南郊邪圓丘邪業與曰委粟是圓丘非南郊异曰比聞郊丘异所是用鄭義我此中用王義業與曰然洛京郊丘之處用鄭

解异曰若然女子逆降傍親亦從鄭以不業與曰此之一事亦不專從若卿此間用王義除禫應用二十五月何以王儉喪禮禫用二十七月也异遂不答業與曰我昨見明堂四柱方屋都無五九之室當是裴頠所制明堂上圓下方裴唯除室耳今此上不圓何也异曰圓方俗說經典無文何怪於方業與曰圓方之言出處甚明卿自不見見卿錄梁主孝經義亦云上圓下方卿言豈非自相矛盾异曰若然圓方竟出何經業與曰出孝經援神契异曰緯候之書何可信也業與曰卿若不信靈威仰叶光紀之類經典亦無出者卿復信不异不答梁武問業與詩周南王者之風繫之周公召南仁賢之風繫之召公何名爲繫業與對曰鄭注儀禮云昔太王王季居于岐陽躬行召南之教以興王業及文王行今周南之教以受命作邑於鄴文王爲諸侯之地所化之國今旣登九五之尊不可復守諸侯之地故分封二公名爲繫梁武又問尙書正月上日受終文祖此時何正業與對曰此夏正月梁武言何以得知業與曰案尙書中候運衡篇云日月營始故知夏正又問堯時以前何月爲正業與對曰自堯以上書典

不載實所不知梁武又云寅賓出日是正月日中星鳥以殷仲春卽是二月此出堯典何得云堯時不知用何正業興對曰雖三五不同言時節者皆據夏時正月周禮仲春二月會男女之無夫家者雖自周書月亦夏時堯之日月亦當如此但所見不深無以辯析明問梁武又曰禮原壤母死叩木而歌孔子聖人而與壤爲友業興對曰孔卽自解言親者不失其親故者不失其故又問壤何處人對曰注云原壤孔子幼之舊故是魯人又問原壤不孝有逆人倫何以存故舊之小節廢不孝之大罪對曰原壤所行事自彰著幼少之交非是今始旣無大故何容棄之又問孔子聖人何以書原壤之事垂法萬代業興對曰此是後人所錄非孔子自制猶合葬於防如此之比禮記之中動有百數又問易有太極極是有無業興對曰所傳太極是有還遷散騎常侍加中軍大將軍業興家世農夫雖學殖而舊音不改梁武問其宗門多少答曰薩四十家使還孫騰謂曰何意爲吳兒所笑對曰業興猶被笑試遣公去當着被罵邢子才云爾婦疾癩或問實耶業興曰爾大癡但道此人疑者半信者半誰檢看武定元年除

國子祭酒仍侍讀神武以業興明術數軍行常問焉業興曰某日某處勝謂所親曰彼若告勝自然賞吾彼若凶敗安能罪吾芒山之役有風從西來入營業興曰小人風來當大勝神武曰若勝以爾爲本州刺史既而以爲太原太守五年齊文襄引爲中外府諮議參軍後坐事禁止業興乃造九宮行棋曆以五百爲章四千四十爲部九百八十七爲升分還以己未爲元始終相維不復移轉與今曆法術不同至於氣序交分景度盈縮不異也文襄之征潁川業興曰往必剋剋後凶文襄旣剋欲以業興當凶而殺之業興愛好墳籍鳩集不已手自補修躬加題帖其家所有垂將萬卷覽讀不息多有異聞諸儒服其深博性豪俠重意氣人有急難委命歸之便能容匿與其好合傾身無恡有乖忤便卽疵毀乃至聲色加以謗罵性又躁隘至於論難之際無儒者之風每語人云但道我好雖知妄言故勝道惡務進忌前不顧後患時人以此惡之至於學術精微當時莫及業興二子崇祖傳父業

崇祖字子述文襄集朝士命盧景裕講易崇祖時年十一論難往復景裕憚之

業與助成其子至於忿鬪文襄色甚不平姚文安難服虔左傳解七十七條名曰駁妄崇祖申明服氏名曰釋謬齊文宣營構三臺材瓦工程皆崇祖所算也封屯留縣侯遵祖齊天保初難宗景曆甚精崇祖爲元子武卜葬地醉而告之曰改葬後當不異孝文武成或告之兄弟伏法

李鉉字寶鼎渤海海南皮人也九歲入學書急就篇月餘便通家素貧常春夏務農冬乃入學年十六從浮陽李周仁受毛詩尙書章武劉子猛受禮記常山房蚪受周官儀禮漁陽鮮于靈馥受左氏春秋鉉以鄉里無可師者遂與州里楊元懿河間宗惠振等結友詣大儒徐遵明受業居徐門下五年常稱高第年二十三便自潛居討論是非撰定孝經論語毛詩三禮義疏及三傳異同周易義例合三十餘卷用心精苦曾三秋冬不畜枕每睡假寐而已年二十七歸養二親因教授鄉里生徒恆數百人燕趙間能言經者多出其門以鄉里寡文籍來游京師讀所未見書舉秀才除太學博士及李同軌卒齊神武令文襄在京妙簡碩學以教諸子文襄以鉉應旨徵詣晉陽時中山石曜北平陽絢北海王晞

清河崔瞻廣平宋欽道及工書人韓毅同在東館師友諸王鉉以去聖久遠文字多有乖謬於講授之暇遂覽說文倉雅刪正六藝經注中謬字名曰字辯天保初詔鉉與殿中尚書邢邵中書令魏收等參議禮律仍兼國子博士時詔北平太守宋景業西河太守綦母懷文等草定新曆錄尚書平原王高隆之令鉉與通直常侍房延祐國子博士刁柔參考得失尋正國子博士廢帝之在東宮文宣詔鉉以經入授甚見優禮卒特贈廷尉少卿及還葬王人將送儒者榮之楊元懿宗惠振官俱至國子博士

馮偉字偉節中山安喜人也身長八尺衣冠甚偉見者肅然少從李寶鼎學李重其聰敏恆別意試問之多所通解尤明禮傳後還鄉里閉門不出將三十年不問生產不交賓客專精覃思無所不通齊趙郡王出鎮定州以禮迎接命書三至縣令親至其門猶辭疾不起王將命駕致請佐吏前後星馳報之縣令又自爲其整冠履不得已而出王下廳事迎之止其拜伏分階而上留之賓館甚見禮重王將舉充秀才固辭不就歲餘請還上知其不願拘束以禮發遣贈遺

甚厚一無所納唯受時服而已及還不交人事郡守縣令每親至歲時或置羊酒亦辭不納門徒束修一毫不受蠶而衣耕而飯簞食瓢飲不改其樂以壽終張買奴平原人也經義該博門徒千餘人諸儒咸推重之仕齊歷太學博士國子助教卒

劉軌思渤海人也說詩甚精少事同郡劉敬和敬和事同郡程師則故其鄉曲多爲詩者軌思仕齊位國子博士

鮑季詳渤海人也甚明禮兼通左氏春秋少時恆爲李寶鼎都講從亦自有徒衆諸儒稱之仕齊卒於太學博士從弟長暄兼通禮傳爲任城王潛丞相掾恆在都教授貴游子弟齊亡卒於家

邢峙字士峻河間鄭人也少學通三禮左氏春秋仕齊初爲四門博士遷國子助教以經入授皇太子峙方正純厚有儒者風廚宰進太子食菜有邪蒿峙令去之曰此菜有不正之名非殿下宜食文宣聞而嘉之賜以被褥縑纈拜國子博士皇建初除清河太守有惠政年老歸致卒于家

劉晝字孔昭渤海阜城人也少孤貧愛學伏膺無倦常閉戶讀書暑月唯着犢鼻禪與儒者李寶鼎同鄉甚相親愛寶鼎授其三禮又就馬敬德習服氏春秋俱通大義恨下里少墳籍便杖策入都知鄴令宋世良家有書五千卷乃求爲其子博士恣意披覽晝夜不息還舉秀才策不第乃恨不學屬文方復緝綴辭藻言甚古拙制一首賦以六合爲各自謂絕倫乃歎儒者勞而寡功曾以賦呈魏收而不拜收忿之謂曰賦名六合已是太愚文又愚於六合君四體又甘於文晝不忿又以示邢子才子才曰君此賦正似疥駱駒伏而無斌媚晝求秀才十年不得發憤撰高才不遇傳冀州刺史酈伯偉見之始舉晝時年四十八刺史隴西李瑱亦嘗以晝應詔先告之晝曰公自爲國舉才何勞語晝齊河南王孝瑜聞晝名每召見輒與促席對飲後遇有密親使且在齋坐晝須臾徑去追謝要之終不復屈孝昭卽位好受直言晝聞之喜曰董仲舒公孫弘可以出矣乃步詣晉陽上書言亦切直而多非世要終不見收采編錄所上之書爲帝道河清中又著金箱壁言蓋以指機政之不良晝夜常夢貴人若吏部尙書者補

交州與俊令寤而密書記之卒後旬餘其家幼女鬼語聲似晝云我被用爲興
俊縣令得假暫來辭別云晝常自謂博物奇才言好矜大每言使我數十卷書
行於後世不易齊景之千駟也容止舒緩舉動不倫由是竟無仕卒於家

馬敬德河間人也少好儒術負笈隨徐遵明學詩禮略通大義而不能精遂留
意於春秋左氏沈思研求晝夜不倦教授於燕趙間生徒隨之者甚衆乃詣州
將求秀才將以其純儒無意推薦敬德請試方略五條皆有文理乃欣然舉送
至都唯得中第請試經業問十條並通擢授國子助教再遷國子博士齊武成
爲後主擇師傅趙彥深進之入爲侍講其妻夜夢猛獸將來向之敬德走超藜
棘妻伏地不敢動敬德占曰吾當爲大官超棘過九卿也爾伏地夫人也後主
旣不好學敬德侍講甚疎時時以春秋入授猶以師傅恩拜國子祭酒儀同三
司金紫光祿大夫瀛州大中正卒其徒曰馬生勝孔子孔子不得儀同尋贈開
府瀛州刺史其後侍書張景仁封王趙彥深云何容侍書封王侍講翻無封爵
亦追封敬德廣漢郡王令子元熙襲

元熙字長明少傳父業兼長文藻以通直待詔文林館武平中皇太子將講孝經有司請擇師帝曰馬元熙朕師之子文學不惡於是以孝經入授皇太子儒者榮其世載性和厚在內甚得名譽隋開皇中卒於秦王文學

張景仁濟北人幼孤家貧以學書爲業遂工草隸選補內書生與魏郡姚元標
潁川韓毅同郡袁買奴滎陽李超等齊名文襄並引爲賓客天保八年敕教太
原王紹德書後王爲東宮武成令侍書遂被引擢小心恭謹後主愛之呼爲博
士登阼累遷通直散騎常侍在左右與語猶稱博士胡人何洪珍有寵於後主
欲得通婚朝士以景仁在內官位稍高遂爲其兄子取景仁第二息瑜之女因
以表裏相援恩遇日隆景仁多疾帝每遣徐之範等療之給藥物珍羞中使問
疾相望於道是後敕有司恆就宅送御食車駕或有行幸在道宿處每送步障
爲遮風寒進位儀同三司加開府侍書如故每旦須參卽在東宮停止及立文
林館中人鄧長顥希旨奏令總判館事除侍中封建安王洪珍死後長顥猶存
舊款更相彌縫得無墜退遂除中書監卒贈侍中五州刺史司空公景仁爲兒

童時在洛京曾詣國學摹石經許子華遇之學中執景仁手曰張郎風骨必當通貴非但官爵遷達乃與天子同筆硯傳衣履子華卒二十餘年景仁位開府數賜衣冠筆硯如子華所言出自寒微本無識見一旦開府侍中封王其婦姓奇莫知氏族所出容制音辭事事庸俚既除王妃與諸公主郡君同在朝謁之列見者爲其慚悚景仁性本卑謙及用胡人巷伯之勢坐致通顯志操頗改漸成驕傲良馬輕裘徒從擁冗高門廣宇當衢向術諸子不思其本自許貴游自倉頡以來八體取進一人而已

權會字正理河間鄭人也志尚沈雅動遵禮則少受鄭易始盡幽微詩書二禮文義該洽兼明風角妙識玄象仕齊初四門博士僕射崔暹引爲館客甚敬重焉命世子達摯盡師傅之禮暹欲薦會與馬敬德等爲諸王師會性恬靜不慕榮勢恥於左官固辭暹識其意遂罷薦舉尋追修國史監知太史局事後遷國子博士會參掌雖繁教授不闕性甚儒悞似不能言及臨機答難酬報如響由是爲諸儒所推而貴游子弟慕其德義者或就其宅或寄宿隣家晝夜承閒受

其學業會欣然演說未嘗懈怠雖明風角玄象至於私室都不及言學徒有請問者終無所說每云此學可知不可言諸君並貴游子弟不由此進何煩問也唯有一子亦不授此術會曾遣家人遠行久而反其行還將至乃逢寒雪寄息他舍會方處學堂講說忽有旋風吹雪入戶會笑曰行人至何意中停遂使追尋果如其語會每占筮大小必中但用爻辭象象以辯吉凶易占之屬都不經口會本貧生無僮僕初任助教日恆乘驢其職事處多非晚不歸曾夜出城東門會獨乘一驢忽有二人一人牽頭一人隨後有似相助其迴動輕漂有異生人漸失路不由本道心甚怪之遂誦易經上篇第一卷不盡前後二人忽然離散會亦不覺墮驢迷悶至明始覺方知墮處乃是郭外纔去家數里有一子字子襲聰敏精勤幼有成人之量先亡臨送者爲其傷慟會惟一哭而罷時人尙其達命武平末自府還第在路無故馬倒遂不得語因暴亡注易一部行於世會生平畏馬位望旣至不得不乘果以此終

張思伯河間樂城人也善說左氏傳爲馬敬德之次撰刊例十卷行於時亦爲

毛詩章句以二經教授齊安王廓位國子博士又有長樂張奉禮善三傳與思伯齊各位國子助教

張彫武中山北平人也家世寒微其兄蘭武仕尚書令史微有資產故護軍長史王元則時爲書生停其宅彫武少美貌爲元則所愛悅故偏被教因好學精力絕人負卷從師不遠千里遍通五經尤明三傳弟子遠方就業者以百數諸儒服其強辯齊神武召入霸府令與諸子講說乾明初累遷平原太守坐贓賄失官武成卽位以舊恩除通直散騎常侍琅邪王儼求博士有司以彫武應選時號得人歷涇州刺史散騎常侍及帝侍講馬敬德卒乃入授經書帝甚重之以爲侍講與侍書張景仁並被尊禮同入華元殿共讀春秋加國子祭酒假儀同三司待詔文林館以景仁宗室自託於其親何洪珍公私之事彫武常爲其指南與張景仁號二張博士時穆提婆韓長鸞與洪珍同侍帷幄知彫武爲洪珍謀主忌惡之洪珍又奏彫武監國史尋除侍中加儀府奏度支事大被委任言多見從特敕奏事不趨呼爲博士彫武自以出於微賤致位大臣勵精在公

有匪躬之節議論無所迴避左右縱恣之徒必加禁約數譏切寵要獻替帷辰帝亦深倚仗之方委以朝政彫武便以激清爲己任意氣甚高嘗在朝堂謂鄭子信曰向入省中見賢家唐令處分極無所以若作數行兵帳彫武不如邕若致主堯舜身居稷契則邕不如我長鸞等陰圖之及與侍中崔季舒黃門侍郎郭遵諫幸晉陽爲長鸞所譖誅臨刑帝使段孝言詰之彫武曰臣起自諸生光寵隆洽今者之諫臣實首謀意善功惡無所逃死願陛下珍愛金玉開發神明數引賈誼之倫語其政道令聽覽之間無所擁蔽則臣雖死猶生之年因獻欬流涕俯而就戮左右莫不憐而壯之子德冲等徙北邊南安王思好之反德冲及弟德揭俱免德冲聰敏好學以帝師之子早見旌擢位中書舍人其父之戮德冲並在殿廷就執目見冤酷號哭殞絕於地久之乃蘇

郭遵者鉅鹿人也齊文宣爲太原公時爲國常侍帝家人有蓋豐洛者典知家務號曰蓋將遵因其處分曾抗拒爲高德正所貴齊受禪由是擢爲主書專令訪察中書舍人朱謂爲鉅鹿太守遵爲弟子求官謂啓文宣鞭之二百付京畿

久之除并省尚書都令史建州別駕會韓長鸞父永興爲刺史因此遂相參附後擢爲黃門侍郎被誅遵出自賤微易爲盈滿宮門逢諸貴輒呼姓字語言布置極爲輕率嘗於宮門牽韓長鸞辭曰王在得言主上縱放如此曾不規諫何名大臣長鸞嫌其率爾便掣手而去由是不加援故及於禍

北史卷八十一

北史卷八十一考證

儒林傳敘以充上選未及簡置○上監本訛生今改從南本

多講王輔嗣所注○王監本訛土又下文齊時儒士句土亦訛土今俱改正

平恆傳呼時老東安公一雍等○一魏書作刁

陳奇傳河北人也○北監本訛止今改從魏書

劉獻之傳雖復不立身之道有何益乎○立身之道上考魏書竟脫去二十七

字遂不成文

至京稱疾而還○稱疾二字監本缺今從魏書增入

五經大義雖有師說而海內諸生多有疑滯○而海內三字監本缺今從魏書

增入

所標宗旨頗異舊義○標監本缺今從魏書增入

注毛詩序義一卷○注毛詩三字監本缺今從魏書增入

張吾貴傳曾在夏學○在監本缺今從魏書增入

北史卷八十二

唐

李

延

壽

撰

列傳第七十

儒林下

沈重

樊深

熊安生

樂遜

黎景熙

冀雋

趙文深

辛彥之

何妥

蕭該

包愷

房暉遠

馬光

劉焯

劉炫

褚暉

顧彪

魯世達

張沖

王孝籍

沈重字子厚吳興武康人也性聰悟弱歲而孤居喪合禮及長專心儒學從師不遠千里遂博覽羣書尤明詩及左氏春秋梁武帝欲高置學官以崇儒教中大通四年乃革選以重補國子助教後除五經博士梁元帝之在藩也甚歎異之及即位乃遣主書何武迎重西上魏平江陵重乃留事梁主蕭詧累遷都官尚書領羽林監詧又令重於合歡殿講周禮武帝以重經明行脩乃遣宣納上

士柳裘致書禮聘又敕襄州總管衛公直敦喻遣之在途供給務從優厚保定末至于京師詔令討論五經并校定鍾律天和中復於紫極殿講三教義朝士儒生桑門道士至者二千餘人重辭義優洽樞機明辯凡所解釋咸爲諸儒所推六年授驃騎大將軍開府儀同三司露門博士仍於露門館爲皇太子講論語建德末表請還梁武帝優詔不許重固請乃許爲遣小司門上士楊汪送之梁主蕭歸拜重散騎常侍太常卿大象二年來朝京師開皇三年卒年八十四隋文帝遣舍人蕭子寶祭以少牢贈使持節上開府儀同三司許州刺史重學業該博爲當世儒宗至於陰陽圖緯道經釋典無不通涉著周禮義三十一卷儀禮義三十五卷禮記義三十卷毛詩義二十八卷喪服經義五卷周禮音一卷儀禮音一卷禮記音二卷毛詩音二卷

樊深字文深河東猗氏人也事繼母甚謹弱冠好學負書從師於河西講習五經晝夜不倦魏永安中隨軍征討以功累遷中散大夫嘗讀書見吾丘子遂歸侍養孝武西遷樊王二姓舉義爲魏所誅深父保周叔父歡周並被害深因避

難墜崖傷足絕食再宿於後遇得一簞餅欲食之然念繼母老痺或免虜掠乃弗食夜中匍匐尋覓母得見因以饋母還復遁去改易姓名遊學於汾晉間習天文及算歷之術後爲人所告囚送河東屬東魏將韓軌長史張曜重其儒學延深至家因是使得逃隱周文平河東贈保周南郢州刺史歡周儀同三司深歸葬其父負土成墳尋而于謹引爲府參軍事令在館授教子孫周文置學東館教諸將子弟以深爲博士深經學通贍每解書多引漢魏以來諸家義而說之故後生聽其言者不能曉悟背而譏之曰樊生講書多門戶不可解然儒者推其博物性好學老而不怠朝暮還往常據鞍讀書至馬驚墮地損折支體終亦不改後除國子博士賜姓萬紐于氏天平二年遷縣伯中大夫加開府儀同三司建德元年表乞骸骨詔許之朝廷有疑議常召問焉後以疾卒深旣專經又讀諸史及倉雅篆籀陰陽卜筮之書學雖博贍訥於辭辯故不爲當時所稱撰孝經喪服問疑各一卷又撰七經異同三卷子義綱

熊安生字植之長樂阜城人也少好學勵精不倦從陳達受三傳從房蚪受周

禮事徐遵明服膺歷年後受禮於李寶鼎遂博通五經然專以三禮教授弟子自遠方至者千餘人乃討論圖緯据撫異聞先儒所未悟者皆發明之齊河清中陽休之特奏爲國子博士時西朝旣行周禮公卿以下多習其業有宿疑磧滯者數十條皆莫能詳辯天和三年周齊通好兵部尹公正使焉與齊人語及周禮齊人不能對乃令安生至賓館與公正言公正有口辯安生語所未至者便撮機要而驟問之安生曰禮義弘深自有條貫必欲升堂觀奧寧可汨共先後但能留意當爲次第陳之公正於是問所疑安生皆爲一一演說咸究其根本公正嗟服還具言之於武帝帝大欽重之及入鄴安生遽令掃門家人怪而問之安生曰周帝重道尊儒必將見我矣俄而帝幸其第詔不聽拜親執其手引與同坐謂曰朕未能去兵以此爲愧安生曰黃帝尙有阪泉之戰况陛下龔行天罰乎帝又曰齊氏賦役繁興竭人財力朕救焚拯溺思革其弊欲以府庫及三臺雜物散之百姓公以爲何如安生曰昔武王克商散鹿臺之財發巨橋之粟陛下此詔異代同美帝又曰朕何如武王安生曰武王伐紂懸首白旗陛

下平齊兵不血刃愚謂聖略爲優帝大悅賜帛三百匹米三百石宅一區并賜象笏及九鑲金帶自餘什物稱是又詔所司給安車駟馬令隨駕入朝并敕所在供給至京敕令於大乘佛寺參議五禮宣政元年拜露門博士下大夫時年八十餘尋致仕卒於家安生既學爲儒宗常受其業擅名於後者有馬榮伯張黑奴竇士榮孔籠劉焯劉炫等皆其門人焉所撰周禮義疏二十卷禮記義疏三十卷孝經義一卷並行於世安生與同郡宗道暉張暉紀顯敬徐遵明等爲祖師道暉好著高翅帽大屐州將初臨輒服以謁見仰頭舉肘拜於屐上自言學士比三公後齊任城王潛鞭之道暉徐呼安偉安偉出謂人曰我受鞭不漢體復躡屐而去冀州人爲之語曰顯公鍾宋公鼓宗道暉屐李洛姬肚謂之四大顯公沙門也宋公安德太守也洛姬婦人也安生在山東時歲歲遊講從之者傾郡縣或誑之曰某村古塚是晉河南將軍熊光去七十二世舊有碑爲村人埋匿安生掘地求之不得連年訟焉冀州長史鄭大謹判之曰七十二世乃是羲皇上人河南將軍晉無此號訴非理記安生率其族向塚而號將通名見

徐之才和士開二人相對以徐之才諱雄和士開諱安乃稱觸觸生羣公哂之
樂遜字遵賢河東猗氏人也幼有成人之操從徐遵明於趙魏間受孝經喪服
論語詩書禮易左氏春秋大義尋而山東寇亂學者散逸遜於擾攘之中猶志
道不倦大統七年除子都督九年太尉李弼請遜教授諸子既而周文盛選賢
良授以守令相府戶曹柳敏行臺郎中盧光河東郡丞辛粲相繼舉遜稱有牧
人之才弼請留不遣魏廢帝二年周文召遜教授諸子在館六年與諸儒分授
經業講孝經論語毛詩及服虔所注春秋左氏傳周閔帝踐阼以遜有理務材
除秋官府上士轉小師氏下大夫自譙王儉以下並東脩行弟子之禮遜以經
術教授甚有訓導之方及衛公直鎮蒲州遜爲直主簿武成元年六月以霖雨
經時詔百官上封事遜陳時宜十四條其五條切於政要其一崇教方其二省
造作其三明選舉其四重戰伐其五禁奢侈保定二年以訓導有方頻加賞賜
遷遂伯中大夫五年詔魯公斌畢公賢等俱以東脩之禮同受業焉天和元年
岐州刺史陳公純舉遜以賢良五年遜以年在懸車上表致仕優詔不許於是

賜以粟帛及錢等授湖州刺史封安邑縣子人多蠻左未習儒風遜勸勵生徒加以課試數年之間化洽州境蠻俗生子長大多與父母異居遜每加勸導多革前弊在任數載頻被褒錫秩滿還朝拜皇太子諫議復在露門教授皇子大象初進爵崇業郡公又爲露門博士二年進位開府儀同大將軍出爲汾陰郡守遜以老病固辭詔許之乃改授東揚州刺史仍賜安車衣服及奴婢等又於本郡賜田十頃儒者以爲榮隋開皇元年卒於家年八十二贈本官加蒲陝二州刺史遜性柔謹寡交遊立身以忠信爲本不自矜尚每在衆言論未嘗爲人之先學者以此稱之所著孝經論語毛詩左氏春秋序論十餘篇又著春秋序義通賈服說發杜氏違辭理並可觀初周又有黎景熙以古學顯

黎景熙字季明河間鄭人少以孝行聞於世曾祖疑魏太武時以軍功賜爵容城縣男後爲燕郡守祖鎮父瓊並襲爵季明少好讀書性強記默識而無應對之能其從祖廣太武時尚書郎善古學常從吏部尚書清河崔宏受字義又從司徒崔浩學楷篆自是家傳其法季明亦傳習之頗與許氏有異又好玄象頗

知術數而落魄不事生業有書千餘卷雖窮居獨處不以飢寒易操與范陽盧道源爲莫逆交永安中道源勸令入仕始爲威烈將軍孝武西遷季明乃寓居伊洛侯景徇地河外召季明從軍稍遷黎陽郡守季明從至懸瓠察景終不足恃遂去之客於潁川時王思政鎮潁川累使召季明留於內館月餘周文又徵之遂入關乃令季明正定古今文字於東閣大統末拜著作佐郎於時倫輩皆位兼常伯車服華盛唯季明獨以貧素居之而無愧色又勤於所職著述不怠然性尤專固不合於時是以一爲史官遂十年不調武成末遷外史下大夫保定三年盛營宮室春夏大旱詔公卿百寮極言得失季明上封事曰臣聞成湯遭旱以六事自陳宣王太甚而珪璧斯竭豈非遠慮元元俯哀黎庶今農要之月時雨猶愆率土之心有懷渴仰陛下垂情萬類子愛羣生覲禮百神猶未豐洽豈或作事不節有違時令舉措失中當邀斯旱春秋君舉必書動爲典禮水旱陰陽莫不應行而至孔子曰言行君子之所以動天地可不慎乎春秋莊公三十一年冬不雨五行傳以爲是歲一年而三築臺奢侈不恤人也僖公二十

一年夏大旱五行傳以爲時作南門勞人興役漢惠帝二年夏大旱五年夏大旱江河水少谿澗水絕五行傳以爲先是發十四萬六千人城長安漢武帝元狩三年夏太旱五行傳以爲是歲發天下故吏穿昆明池然則土木之功動人興役天輒應之以異典籍作誠儻或可思上天譴告改之則善今若息人省役以答天譴庶靈澤時降嘉穀有時則年登可覲子來非晚詩云人亦勞止迄可小康惠此中國以綏四方或恐極陽生陰秋多雨水年復不登人將無覲如又荐飢爲慮更甚時豪富之家競爲奢麗季明又上書曰臣聞寬大所以兼覆慈愛所以懷衆故天地稱其高厚者萬物得其容養焉四時著其寒暑者庶類資其忠信焉是以帝王者寬大象天地忠信則四時招搖東指天下識其春人君布德率土懷其惠伏惟陛下資乾御寓品物咸亨時乘六龍自強不息好問受規天下幸甚自古至道之君亦皆廣延博訪詢採芻蕘置鼓樹木以求其過頃者亢旱踰時人懷望歲陛下爰發明詔廣求六瘼同禹湯之罪己高宋景之守正澍雨應時年穀斯稔剋己節用慕質去華此則尙矣然而朱紫仍耀於衢路

綺縠猶侈於豪富短褐未充於細人糟糠未厭於編戶此則勸導之理有所未周故也今雖導之以禮齊之以刑風俗固難以一矣昔漢文帝集上書之囊以作帷帳惜十家之產不造露臺後宮所幸衣不曳地方之今日富室之飾嘗不如婢隸之服然而以身率下國富刑清廟稱太宗良有以也臣聞聖人久於其道而天下化成今承魏氏衰亂之後貞信未興宜先尊五美屏四惡革浮華之俗抑流競之風察鴻都之小藝焚雉頭之異服無益之貨勿重於時虧德之器勿陳於側則人知德矣臣又聞之爲政之要在於選舉若差之毫釐則有千里之失後來居上則致積薪之譏是以古之善爲政者貫魚以次任必以能爵人於朝不以私愛簡才以授其官量能以任其用官得其才任當其用六轡旣調坐致千里虞舜選衆不仁者遠則庶事康哉人知其化矣帝覽而嘉之時外史廉宇屢移未有定所季明又上言曰外史之職漢之東觀帝王所寶此焉攸在自魏及周公館不立臣雖愚瞽猶知其非是以去年十一月中敢冒奏陳特降中旨卽遣脩營在萬一周未知功力臣職思其憂敢不重請帝納焉於是廉宇

方立天和二年進車騎大將軍儀同三司後以疾卒又周文初屬天下分崩時學術之士蓋寡故曲學末伎咸見引納至若冀儁趙文深之徒雖才愧昔人而名著於世並見收用

冀儁字僧儁太原陽邑人也性沉謹善隸書特工模寫初爲賀拔岳墨曹參軍岳被害周文引爲記室時周文志平侯莫陳悅乃令儁僞爲魏帝敕書與費也頭令將兵助周文討悅儁尋舊敕模寫及代舍人主書等署與真無異周文大悅費也頭見敕不以爲疑遂遣兵受周文節度大統初封長安縣男從征弘農戰於沙苑進爵爲子累遷襄樂郡守尋徵還教明帝及宋獻公等隸書時俗入書學者亦行束脩之禮謂之謝章儁以書字所興起自蒼頡若同常俗未爲合禮遂啓周文釋奠蒼頡及先聖先師除黃門侍郎本州大中正累遷湖州刺史靜退每以清約自處前後所歷頗有聲稱尋加驃騎大將軍開府儀同三司後進爵爲昌樂侯卒

趙文深字德本南陽宛人也父選以醫術仕魏爲尙藥典御文深少學楷隸年

十一獻書於魏帝後立義歸朝除大丞相府法曹參軍雅有鍾王之則筆勢可觀當時碑榜唯文深冀儻而已大統十二年追論立義功封白石縣男文帝以隸書紕繆命文深與黎季明沈遐等依說文及字林刊定六體成一萬餘言行於世及平江陵之後王褒入關貴遊等翕然並學褒書文深之書遂被遐棄文深慚恨形於言色後知好尚難及亦改習褒書然竟無所成轉被譏議謂之學步邯鄲焉至於碑榜餘人猶莫之逮王褒亦每推先之宮殿樓閣皆其迹也遷縣伯下大夫明帝令至江陵書景覆寺碑漢南人士亦以爲工梁王蕭譽觀而美之賞遺甚厚天和元年露寢等初成文深以題榜之功除趙興郡守文深雖居外任每須題榜輒復追之後以疾卒

辛彥之隴西狄道人也祖世敘魏涼州刺史父靈補周渭州刺史彥之九歲而孤不交非類博涉經史與天水牛弘同志好學後入關遂家京兆周文見而器之引爲中外府禮曹賜以衣馬珠玉時國家草創朝貴多出武人修定儀注唯彥之而已尋拜中書侍郎及周閔帝受禪彥之與小宗伯盧辯專掌儀制歷典

祀太祝樂部御正四曹大夫開府儀同三司封五原郡公宣帝卽位拜小宗伯時帝立五皇后彥之切諫由是忤旨免官隋文帝受禪除太常少卿改封任城郡公進位開府歷國子祭酒禮部尙書與祕書監牛弘撰新禮帝嘗令彥之與沈重論議重不能抗避席而謝曰辛君所謂金城湯池無可攻之勢帝大悅後除隋州刺史時州牧多貢珍玩惟彥之所貢並共祭之類上謂朝臣曰人安得無學彥之所貢稽古之力也遷潞州刺史前後俱有惠政彥之又崇信佛道於城內立浮圖二所並十五層開皇十一年州人張元暴死數日乃蘇云遊天上見新構一堂制極崇麗元問其故云潞州刺史辛彥之有功德造此堂以待之彥之聞而不悅其年卒諡曰宣彥之撰墳典一部六官一部祝文一部禮要一部新禮一部五經異義一部並行於世子孝舒仲龕並早有令譽

何妥字栖鳳西城人也父細脚胡通商入蜀遂家郫縣事梁武陵王紀主知金帛因致巨富號爲西州大賈妥少機警八歲遊國子學助教顧良戲之曰汝姓何是荷葉之荷爲河水之河妥應聲答曰先生姓顧是眷顧之顧爲新故之故

衆咸異之十七以伎巧事湘東王後知其聰明召爲誦書左右時蘭陵蕭脊亦有儁才住青楊巷委住白楊頭時人爲之語曰世有兩儁白楊何委青楊蕭脊其見美如此江陵平入周仕爲太學博士宣帝初立五后問儒者辛彥之對曰后與天子匹體齊尊不宜有五委駁曰帝嚳四妃舜又二妃亦何常數由是封襄城縣男文帝受禪除國子博士加通直散騎常侍進爵爲公委性勁急有口才好是非人物納言蘇威嘗言於上曰臣先人每誡臣云唯讀孝經一卷足可立身經國何用多爲上亦然之委進曰蘇威所學非止孝經厥父若信有此言威不從訓是其不孝若無此言面欺陛下是其不誠不誠不孝何以事君且夫子又云不讀詩無以言不讀禮無以立豈容蘇綽教子獨反聖文之訓乎威時兼領五職上甚親重之委因奏威不可信任又以掌天文律度皆不稱職委上八事以諫其一事曰臣聞知人則哲惟帝難之孔子曰舉直錯枉則人服舉枉錯直則人不服由此言之政之安危必慎所舉故進賢受上賞蔽賢蒙顯戮察今之舉人良異于此無論詔直莫擇賢愚心欲崇高則起家喉舌之任意須抑

屈必白首郎署之官人之不服實由於此臣聞爵人於朝與士共之刑人於市與衆棄之伏見留心獄訟愛人如子每應決獄無不詢訪羣公刑之不濫君之明也刑旣如此爵亦宜然若有懋功簡在帝心者便可擢用自斯以降若選重官必參以衆議勿信一人之舉則上不偏私下無怨望其二事曰孔子云是察阿黨則罪無掩蔽又曰君子周而不比小人比而不周所謂比者卽阿黨也謂心之所愛旣以光華榮顯猶加提挈心之所惡旣已沉滯屈辱薄言必怒提挈旣成必相掩蔽則欺上之心生矣屈辱旣加則有怨恨謗讟之言出矣伏願廣加訪察勿使朋黨路開威恩自任有國之患莫大於此其三事曰臣聞舜舉十六族所謂八元八凱也許其賢明理優今日猶復擇才授任不相侵濫故得四門雍穆庶績咸熙今官員極多人甚少一人身上乃兼數職爲是國無人也爲是人不善也今萬乘大國鬣彥不少縱有明哲無由自達東方朔言曰尊之則爲將卑之則爲虜斯言信矣今當官之人不度德量力旣無呂望傅說之能自負傅巖渭水之氣不慮憂深責重唯畏總領不多安斯寵任輕彼權軸顛沛

致蹶實此之由易曰鼎折足覆公餗其形渥凶言不勝其任也臣聞窮力舉重不能爲用伏願更任賢良分才參掌使各行其力則庶事康哉其四事曰臣聞禮云析言破律亂名改作執左道以亂政者殺孔子曰仍舊貫何必改作伏見比年以來改作者多矣如范威刻漏十載不成趙翊尺秤七年方決公孫濟迂誕醫方費逾巨萬徐道慶迴互子午糜耗飲食常明破律多歷歲時王渥亂名曾無紀極張山居未知星位前已蹂藉太常曹魏祖不識北辰今復轆轤太史莫不用其短見便自夸毗邀射名譽厚相誣罔請今日已後有如此者若其言不驗必加重罰庶令有所畏忌不敢輕奏狂簡其餘文多不載時蘇威權兼數職先嘗隱武功故妄言自負傅巖渭水之氣以此激上書奏威大銜之二年威定考文學安更相訶詆威勃然曰無何安不慮無博士安應聲曰無蘇威亦何憂無執事於是與威有隙其後上令安考定鍾律安又上表曰臣聞明則有禮樂幽則有鬼神然則動天地感鬼神莫近於禮樂又云樂至則無怨禮至則不爭揖讓而臨天下者禮樂之謂也臣聞樂有二一曰姦聲二曰正聲夫姦聲感

人而逆氣應之正聲感人而順氣應之順氣成象故樂行而倫清耳目聰明血氣和平移風易俗天下皆寧孔子曰放鄭聲遠佞人故鄭衛宋趙之聲出內則發疾外則傷人是以宮亂則荒其君驕商亂則破其官壞角亂則憂其人怨徵亂則哀其事勤羽亂則危其財匱五者皆亂則國亡無日矣魏文侯問子夏曰吾端冕而聽古樂則欲寐聽鄭衛之音而不倦何也子夏對曰夫古樂者始奏以文復亂以武修身及家平均天下鄭衛之音者姦聲以亂溺而不止優雜子女不知父子今君所問者樂也所愛者音也夫樂之與音相近而不同爲人君者謹審其好惡案聖人之作樂也非止苟悅耳目而已矣欲使在宗廟之內君臣同聽之則莫不和敬在鄉里之內長幼同聽之則莫不和順在閭門之內父子同聽之則莫不和親此先王立樂之方也故知聲而不知音者禽獸是也知音而不知樂者衆庶是也故黃鍾大呂弦歌干戚童子皆能舞之能知樂者其惟君子不知聲者不可與言音不知音者不可與言樂知樂則幾於道矣紂爲無道太師抱樂器以奔周晉君德薄師曠固惜清徵上古之時未有音樂鼓腹

擊壤樂在其間易曰先王作樂崇德殷薦之上帝以配祖考至于黃帝作咸池
顓頊作六莖帝嚳作五英堯作大章舜作大韶禹作大夏湯作大濩武王作大
武從夏以來年代久遠唯有名字其聲不可得聞自殷至周備于詩頌故自聖
賢已下多習樂者至如伏羲滅瑟文王足琴仲尼擊磬子路鼓瑟漢高擊筑元
帝吹簫漢祖之初叔孫通因秦樂人制宗廟之樂迎神于廟門奏嘉至之樂猶
古降神之樂也皇帝入廟門奏永至之樂以爲行步之節猶古采薺肆夏也乾
豆上薦奏登歌之樂猶古清廟之歌也登歌再終奏休成之樂美神饗也皇帝
就東廂坐定奏永安之樂美禮成也其休成永至二曲叔孫通所制也漢高祖
廟奏武德文始五行之舞當春秋時陳公子完奔齊陳是舜後故齊有韶樂孔
子在齊聞韶三月不知肉味是也秦始皇滅齊韶樂傳於秦漢高祖滅秦韶樂
傳於漢漢高祖改名文始以示不相襲也五行舞者本周大武樂也始皇改曰
五行及于孝文復作四時之舞以示天下安和四時順也孝景采武德舞以爲
昭德孝宣又采昭德以爲盛德雖變其名大抵皆因秦舊事至於晉魏皆用古

樂魏之三祖並制樂辭自永嘉播越五都傾蕩樂聲南度以是大備江東宋齊已來至于梁代所行樂事猶皆傳古三雍四始實稱大盛及侯景篡逆樂師分散其四舞三調悉度僞齊齊氏雖知傳受得曲而不用之於宗廟朝廷也臣少好音律留意管弦年雖耆老頗皆記憶及東土克定樂久悉反問其逗留果云是梁人所教今三調四舞並皆有手雖不能精熟亦頗具雅聲若令教習傳授庶得流傳古樂然後取其會歸撮其指要因循損益更制嘉名歌盛德於當今傳雅正於來葉豈不美歟謹具錄三調四舞曲名又製歌辭如別其有聲曲流宕不可以陳於殿庭者亦悉附之於後書奏別敕太常取妥節度於是作清平瑟三調聲又作八佾鞞鐸巾拂四舞先是太常所傳宗廟雅樂歷數十年唯作大呂廢黃鍾妥又以深乖古意乃奏請用黃鍾詔下公卿議從之俄而子蔚爲祕書郎有罪當刑上哀之減死論是後恩禮漸薄六年出爲龍州刺史時有負笈遊學者妥皆爲講說教授之又爲刺史箴勒于州門外在職三年以疾請還詔許之復知學事時上方使蘇夔在太常參議鍾律夔有所建議朝士多從之

妥獨不同每言夔之失帝下其議羣臣多排妥妥復上封事指陳得失大抵論時政損益并指斥當世朋黨於是蘇威及吏部尙書盧愷侍郎薛道衡等皆坐得罪除伊州刺史不行尋爲國子祭酒卒官諡曰肅撰周易講疏三卷孝經義疏二卷莊子義疏四卷與沈重等撰三十六科鬼神感應等大義九卷封禪書一卷樂要一卷文集十卷並行於世于時學士之自江南來者蕭該包愷並知名

蕭該蘭陵人梁鄱陽王恢之孫少封攸侯荊州平與何妥同至長安性篤學詩書春秋禮記並通大義尤精漢書甚爲貴遊所禮開皇初賜爵山陰縣公拜國子博士奉詔與妥正定經史然各執所見遞相是非久而不能就上譴而罷之該後撰漢書及文選音義咸爲當時所貴

包愷字和樂東海人其兄愉明五經愷悉傳其業及從王仲通受史記漢書尤稱精究大業中爲國子助教于時漢書學者以蕭包二人爲宗遠近聚徒教授者數千人卒門人起墳立碣焉

房暉遠字崇儒恆山真定人也世傳儒學暉遠幼有志行明三禮春秋三傳詩書周易兼善圖緯恆以教授爲務遠方負笈而從者動以千計齊南陽王綽爲定州刺史聞其名召爲博士周武帝平齊搜訪儒俊暉遠首應辟命授小學下士隋文帝受禪遷太常博士太常卿牛弘每稱爲五經庫吏部尙書韋世康薦之遷太學博士尋與沛公鄭譯修正樂章後復爲太常博士未幾擢爲國子博士會上令國子生通一經者並悉薦舉將擢用之旣策問訖博士不能時定臧否祭酒元善怪問之暉遠曰江南河北義例不同博士不能遍涉學生皆持其所短稱己所長博士各各自疑所以久而不決也祭酒因令暉遠考定之暉遠覽筆便下初無疑滯或有不服者暉遠問其所傳義疏輒爲始末誦之然後出其所短自是無敢飾非者所試四五百人數日便決諸儒莫不推其通博皆自以爲不能測也尋奉詔預修令式文帝嘗謂羣臣曰自古天子有女樂乎楊素以下莫知所出遂言無女樂暉遠曰臣聞窈窕淑女鍾鼓樂之此卽王者房中之樂著於雅頌不得言無帝大悅仁壽中卒官朝廷嗟惜焉賙賻甚厚贈員外

散騎常侍

馬光字榮伯武安人也少好學從師數十年晝夜不息圖書讖緯莫不畢覽尤明三禮爲儒者所宗隋開皇初徵山東義學之士光與張仲讓孔籠竇仕榮張買奴劉祖仁等俱至並授太學博士時人號爲六儒然皆鄙野無儀範朝廷不之貴也仕榮尋病死仲讓未幾告歸鄉里著書十卷自云此書若奏必爲宰相又數言玄象事州縣列上竟坐誅孔籠張買奴劉祖仁未幾亦被譴亡唯光獨存嘗因釋奠帝親幸國子學王公已下畢集光升坐講禮啓發章門已而諸儒生以次論難者十餘皆當時碩學光剖析疑滯雖辭非俊辯而禮義弘贍論者莫測其淺深咸共推服上嘉而勞焉山東三禮學者自熊安生後唯宗光一人初教授瀛博間門徒千數至是多負笈從入長安後數年丁母憂歸鄉里以疾卒于家

劉焯字士元信都昌亭人也犀額龜背望高視遠聰敏沉深弱不好弄少與河間劉炫結盟爲友同受詩於同郡劉軌思受左傳於廣平郭懋常問禮於阜城

熊安生皆不卒業而去武強交津橋劉智海家素多墳藉焯就之讀書向經十載雖衣食不繼宴如也遂以儒學知名爲州博士隋開皇中刺史趙張引爲從事舉秀才射策甲科與著作郎王邵同修國史兼參議律歷仍直門下省以待顧問俄除員外將軍後與諸儒於祕書省考定羣言因假還鄉里縣令韋之業引爲功曹尋復入京與左僕射楊素吏部尙書牛弘國子祭酒蘇威元善博士蕭該何妥太學博士房暉遠崔崇德晉王文學崔躋等於國子共論古今滯義前賢所不通者每升坐論難鋒起皆不能屈楊素等莫不服其精博六年運洛陽石經至京師文字磨滅莫能知者奉敕與劉炫二人論義深挫諸儒咸懷妬恨遂爲飛章所謗除名於是優游鄉里專以教授著述爲務孜孜不倦賈馬王鄭所傳章句多所是非九章算術周髀七躍歷書十餘部推步日月之經量度山海之術莫不覈其根本窮其祕奧著稽極十卷歷書十卷五經述議並行於世劉炫聰明博學名亞於焯故時人稱二劉焉天下名儒後進質疑受業不遠千里而至者不可勝數論者以爲數百年已來博學通儒無能出其右者然懷

抱不曠又嗇於財不行束脩者未嘗有所教誨時人以此少之廢太子勇聞而召之未及進謁詔令事蜀王非其好也久之不至王聞而大怒遣人枷送於蜀配之軍防其後典校書籍王以罪廢焯又與諸儒脩定禮律除雲騎尉煬帝卽位遷太學博士俄以品卑去職數年復被徵以待顧問因上所著歷書與太史令張胄玄多不同被駁不用卒劉炫爲之請諡朝廷不許

劉炫字光伯河間景城人也少以聰敏見稱與信都劉焯閉戶讀書十年不出炫眸子精明視日不眩強記默識莫與爲儔左畫圓右畫方口誦目數耳聽五事同舉無所遺失周武帝平齊瀛州刺史宇文充召爲戶曹從事後刺史李繪署禮曹從事以吏幹知名隋開皇中奉敕與著作郎王劭同修國史俄直門下省以待顧問又詔諸術者修天文律歷兼於內史省考定羣言內史令博陵李德林甚禮之炫雖遍直三省竟不得官爲縣司責其賦役炫自陳於內史內史送詣吏部尙書韋世康問其所能炫自爲狀曰周禮禮記毛詩尙書公羊左傳孝經論語孔鄭王何服杜等注凡十三家雖義有精粗並堪講授周易儀禮穀

梁用功差少史子文集嘉言故事咸誦於心天文律歷窮覈微妙至於公私文翰未嘗假手吏部竟不詳試然在朝知名之士十餘人保明炫所除不謬於是除殿內將軍時牛弘奏購求天下遺逸之書炫遂僞造書百餘卷題爲連山易魯史記等錄上送官取賞而去後有人訟之經赦免死坐除名歸于家以教授爲務廢太子勇聞而召之既至京師敕令事蜀王秀遷延不往秀大怒枷送益州旣而配爲帳內每使執仗爲門衛俄而釋之典校書史炫因擬屈原卜居爲筮塗以自寄及秀廢與諸儒修定五禮授旅騎尉吏部尙書牛弘建議以爲禮諸侯絕傍期大夫降一等今之上柱國雖不同古諸侯比大夫可也官在第二品宜降傍親一等議者多以爲然炫駁之曰古之仕者宗一人而已庶子不得進由是先王重嫡其宗子有分祿之義族人與宗子雖疎遠猶服衰三月良由受其恩也今之仕者位以才升不限嫡庶與古旣異何降之有今之貴者多忽近親若或降之人道之疎自此始矣遂寢其事開皇二十年廢國子四門及州縣學唯置太學博士二人學生七十二人炫上表言學校不宜廢情理甚切帝

不納時國家殷盛皆以遼東爲意炫以爲遼東不可伐作撫夷論以諷焉當時莫有悟者及大業之季三征不剋炫言方驗煬帝卽位牛弘引炫修律令始文帝時以刀筆吏類多小人年久長姦勢使然也又以風俗陵遲婦人無節於是立格州縣佐吏三年而代之九品妻無得再醮炫著論以爲不可弘竟從之諸郡置學官及流外給稟皆發於炫弘嘗問炫案周禮士多而府史少今令史百陪於前判官減則不濟其故何也炫曰古人委任責成歲終考其殿最案不重校文不繁悉府史之任掌要目而已今之文簿恆慮勤覆鍛鍊若其不密萬里追證百年舊案故諺云老吏抱案死今古不同若此之相懸也事煩政弊職此之由弘又問魏齊之時令史從容而已今則不遑寧舍其事何由炫曰齊氏立州不過數十三府行臺遞相統領文書行下不過十條今州三百其繁一也往者州唯置綱紀郡置守丞縣唯令而已其所具僚則長官自辟受詔赴任每州不過數十今則不然大小之官悉由吏部纖介之迹皆屬考功其繁二也省官不如省事省事不如清心官事不省而望從容其可得乎弘甚善其言而不能

用納言楊達舉炫博學有文章射策高第除太學博士歲餘以品卑去任還至長平奉敕追詣行在所或言其無行帝遂罷之歸于河間時盜賊蜂起穀食踊貴經籍道息教授不行炫與妻子相去百里聲聞斷絕鬱鬱不得志乃自爲贊曰通人司馬相如揚子雲馬季長鄭康成等皆自敘徽美傳芳來葉余豈敢仰均先進貽笑後昆徒以日迫桑榆大命將近故友飄零門徒雨散溘死朝露魂埋朔野親故莫照其心後人不見其迹殆及餘喘薄言胸臆貽及行邁傳之州里使夫將來俊哲知余鄙志耳余從縮髮以來迄於白首嬰孩爲慈親所恕捶撻未嘗加從學爲明師所矜榎楚弗之及暨乎敦敘邦族交結等夷重物輕身先人後己昔在幼弱樂參長者爰及耆艾數接後生學則服而不厭誨則勞而不倦幽情寡適心事多違內省生平顧循終始其大幸有四深恨有一性本愚蔽家業貧窶爲父兄所饒廁縉紳之末遂得博覽典誥窺涉今古小善著於丘園虛名聞於邦國其幸一也隱顯人間沉浮世俗數忝徒勞之職久執城旦之書名不挂於白簡事不染於丹筆立身立行慚惡實多啓手啓足庶幾可免其

幸二也以此庸虛屢動宸眷以此卑賤每升天府齊鑣驥隸比翼鷓鴻整緇素於鳳池記言動於麟閣參謁宰輔造請羣公厚禮殊恩增榮改價其幸三也晝漏方盡大耋已嗟退反初服歸骸故里翫文史以怡神閱魚鳥以散慮觀省野物登臨園沼緩步代車無事爲貴其幸四也仰休明之盛世慨道教之陵遲蹈先儒之逸軌傷羣言之蕪穢馳騁墳典釐改僻謬修撰始畢事業適成天違人願途不我與世路未夷學校盡廢道不備於當時業不傳於身後銜恨泉壤實在茲乎其深恨一也時在郡城糧餉斷絕其門人多隨盜賊哀炫窮乏詣城下索炫郡官乃出炫與之炫爲賊所將過城下堡未幾賊爲官軍所破炫飢餓無所依復投縣官縣官意炫與賊相知恐爲後變遂閉門不納時夜冰寒因此凍餒而死其後門人謚曰宣德先生炫性躁競頗好俳諧多自矜伐好輕侮當世爲執政所醜由是宦途不遂著論語述議十卷春秋攻昧十卷五經正名十二卷孝經述議五卷春秋述議四十卷尙書述議二十卷毛詩述議四十卷注詩序一卷算術一卷并所著文集並行於世時儒學之士又有褚暉顧彪魯世達

張沖王孝籍並知名

褚暉字高明吳郡人以三禮學稱於江南煬帝時徵天下儒術之士悉集內史省相次講論暉辯博無能屈者由是擢爲太學博士撰疏一百卷

顧彪字仲文餘杭人明尚書春秋煬帝時爲祕書學士撰古文尚書義疏二十卷行於世

魯世達餘杭人煬帝時爲國子助教撰毛詩章句義疏四十二卷行於世

張沖字叔玄吳郡人仕陳爲左中郎將非其好也乃覃思經典撰春秋義略異於杜氏七十餘事喪服義三卷孝經義三卷論語義十卷前漢音義十二卷官至漢王侍讀

王孝籍平原人少好學博覽羣言遍習五經頗有文翰與河間劉炫同志友善開皇中召入祕書助王劼修國史劼不之禮在省多年不免輸稅鬱鬱不得志奏記於吏部尚書牛弘曰竊以毒螫瘠膚則申旦不寐飢寒切體亦卒歲無聊何則痛苦難以安貧窮易爲感況懷抱之內冰火鑠脂膏腠理之間風霜侵骨

髓安可齧舌絨唇吞聲飲氣惡呻吟之響忍酸辛之酷哉伏惟明尚書公動哀矜之色開寬裕之懷咳唾足以活涸鱗吹噓可用飛窮羽芬椒蘭之氣暖布帛之詞許小人之請聞大君之德雖復山川綿遠鬼神在茲信而有徵言無不履猶恐拯溺遲於援手救跌緩於扶足待越人之舟楫求魯將之雲梯則必懸於喬樹之枝沒於深泉之底夫以一介貧人七年直省課役不免慶賞不霑賣貢禹之田供釋之之費有弱子之累乏強兄之產加以慈母在堂光陰遲暮寒暑違闕關山超遠齧臂爲期前途逾邈倚閭之望朝夕傾對謝相如之病無官可以免發梅福之狂非仙所能避愁疾甚乎厲鬼人生異夫金石營魂且散恐筮子無徵齋恨入冥則虛緣恩顧此乃王稽所以致言應侯爲之不樂也潛鬢髮之內居眉睫之間子野未曾聞離朱所未見久淪東觀留滯南史終無薦引永同埋殯三世不移雖由寂寞十年不調實乏知己夫不世出者聖明之君也不萬一者誠賢之臣也以夫不世出而逢不萬一小人所以爲明尚書幸也坐人物之源運銓衡之柄反被狐白不好緇衣此小人爲明尚書不取也昔荆玉未

剖削卞和之足百里未用碎禽息之首居得言之地有能用之資憎耳目之明無首足之戚憚而不爲孰知其解夫官或不稱其能士或未申其屈一夫竊議語流天下勞不見圖安能無望儻病未及死狂還克念汗窮愁之簡屬離憂之詞託志於前脩通心於來哲使千載之下哀其不遇追咎執事有玷清塵則不肖之軀死生爲累小人之罪方且未刊願少加憐愍留心無忽弘亦知其學業而竟不得調後歸鄉里以教授爲業終于家注尙書及詩遭亂零落

論曰古語云容體不足觀勇力不足恃族姓不足道先祖不足稱然而顯聞四方流聲復胤者其惟學乎信哉斯言也梁越之徒篤志不倦自求諸己遂能聞道下風稱珍席上或聚徒千百或服冕飛軒咸稽古之力也然遠惟漢魏碩學多清通逮乎近古巨儒多鄙俗文武不墜弘之在人豈獨愚蔽於當今而皆明哲於往昔在乎用與不用知與不知耳然曩之弼諧庶績必舉德於鴻儒近代左右邦家咸取士於刀筆縱有學優入室勤踰刺股名高海內擢第甲科若命偶時來未有望於青紫或數將運舛必見棄於草澤然則古之學者祿在其中

今之學者困於貧賤明達之人志識之士安肯滯於所習以求貧賤者哉此所以儒罕通人學多鄙俗者也至若劉焯德冠搢紳數窮天象既精且博洞究幽微鉤深致遠源流不測數百年來斯一人而已劉炫學實通儒才堪成務九流七略無不該覽雖探蹟索隱不逮於焯裁成義說文雅過之並時不我與餒棄溝壑斯乃子夏所謂死生有命富貴在天天之所與者聰明所不與者貴仕上聖且猶不免焯炫其如命何孝籍徒離騷其立尙何救也

北史卷八十二

北史卷八十二考證

沈重傳梁武帝欲高置學官以崇儒教○梁閣本誤詔今改從周書

桑門進士○桑監本訛乘今改從周書

樊深傳負書從師於河西○河西周書作三河

天平二年○平周書作和

黎景熙傳河間鄭人○鄭當係鄭字之訛

趙文深傳父選○選周書作選

辛彥之傳父靈補○補隋書作輔

何妥傳父細脚胡通商入蜀○隋書無脚字

必加重罰庶令有所畏忌○畏監本訛思今改從南本

魏文侯問子夏曰○問監本訛何今改正

馬光傳光與張仲讓孔籠竇仕榮張買奴劉和仁等○隋書仕作士買作黑

劉炫傳後有人訟之經赦免死○有人監本訛人有今改從周書

整緝素於鳳池記言動于麟閣○緝監本訛紬今改從周書
炫爲賊所將過城下堡○城下監本作下城今改從隋書
王孝籍傳倚閭之望朝夕傾對○傾對隋書作已勤

北史卷八十二考證

北史卷八十三

唐

李

延

壽

撰

列傳第七十一

文苑

温子昇

荀濟

祖鴻勳

李廣

樊遜

荀士遜

王褒

庾信

顏之推弟之儀

虞世基

柳晉

許善心

李文博

明克讓

劉臻

諸葛頴

王貞

虞綽

王胄

庾自直

潘徽常德志 尹式 祖君彥 孔德紹 劉善經 劉斌

易曰觀乎天文以察時變觀乎人文以化成天下然則文之為用其大矣哉逖

聽三古彌綸百代若乃墳素所紀靡得而云典謨已降遺風可述至於制禮作

樂騰實飛聲善乎言之不文行之豈能遠也是以曲阜之多才多藝監二代以

正其源闕里之性與天道修六經以維其末用能窮神知化稱首於千古經邦
緯俗藏用於百代至哉斯固聖人之述作也逮乎兩周道喪七十義乖淹中稷
下八儒三墨之異漆園黍谷名法兵農之別雖雅誥奧義或未盡善考其遺跡
亦賢達之流乎其離讒放逐之臣塗窮後門之士道輻軻而未遇志鬱抑而不
申憤激委約之中飛文魏闕之下奮迅泥滓自致青雲振沉溺於一朝流風聲
於千載者往往而有矣漢自孝武之後雅尚斯文揚葩振藻者如林而二馬王
楊爲之傑東京之朝茲道逾扇咀徵含商者成市而班傅張蔡爲之雄當塗受
命尤好蟲篆金行勃興無替前烈曹王陳阮負宏衍之思挺桂幹於鄧林潘陸
張左擅侈麗之才飾羽儀於鳳穴斯並高視當世連衡孔門雖時運推移質文
屢變譬猶六代並奏易俗之用無爽九源競逐一致之理同歸歷選前英於斯
爲盛旣而中州板蕩戎狄交侵僭僞相屬生靈塗炭故文章黜焉其能潛思於
戰爭之間揮翰於鋒鏑之下亦有時而間出矣若乃魯徵杜廣徐光尹弼之儔
知名於二趙宋該封奕朱彤梁讜之屬見重於燕秦然皆迫於倉卒牽於戰陣

章奏符檄則粲然可觀體物緣情則寂寥於世非其才有優劣時運然也至於朔方之地叢爾夷俗胡義周之頌國都足稱宏麗區區河右而學者捋於中原劉延明之銘酒泉可謂清典子曰十室之邑必有忠信豈徒言哉洎乎有魏定鼎沙朔南包河淮西吞關隴當時之士有許謙崔宏宏子浩高允高閭游雅等先後之間聲實俱茂詞義典正有永嘉之遺烈焉及太和在運銳情文學因以頽頹漢徹跨躡曹丕氣韻高遠豔藻獨構衣冠仰止咸慕新風律調頗殊曲度遂改辭罕泉源言多胸臆潤古彫今有所未遇是故雅言麗則之奇綺合繡聯之美眇歷歲年未聞獨得既而陳郡袁翻河內常景晚拔疇類稍革其風及明皇御歷文雅大盛學者如牛毛成者如麟角孔子曰才難不其然也于時陳郡袁翻翻弟躍河東裴敬憲弟莊伯莊伯族弟伯茂范陽盧觀弟仲宣頓丘李諧渤海高肅河間邢臧趙國李騫彫琢瓊瑤刻削杞梓並爲龍光俱稱鴻翼樂安孫彥舉濟陰溫子昇並自孤寒鬱然特起咸能綜採繁縟興屬清華比於建安之徐陳應劉元元之潘張左束各一時也有齊自霸業云啓廣延髦俊開四門

以賓之頓八紘以掩之鄴都之下煙霏霧集河間邢子才鉅鹿魏伯起范陽盧元明鉅鹿魏季景清河崔長儒河間邢子明范陽祖孝徵中山杜輔玄北平陽子烈並其流也復有范陽祖鴻勳亦參文士之列及天保中李愔陸卬崔瞻陸元規並在中書參掌綸誥其李廣樊遜李德林盧詢祖盧思道始以文章著名皇建之朝常侍王晞獨擅其美河清天統之辰杜臺卿劉逖魏騫亦參詔勅自李愔已下在省唯撰述除官詔旨其關涉軍國文翰多是魏收作之及在武平李若荀士遜李德林薛道衡並爲中書侍郎典司綸綍後主雖溺於羣小然頗好詠詩幼時嘗讀詩賦語人云終有解作此理不初因畫屏風勅通直郎蕭放及晉陵王孝式錄古賢烈士及近代輕豔諸詩以充圖畫帝彌重之後復追齊州錄事參軍蕭愨趙州功曹參軍顏之推同入撰錄猶依霸朝謂之館客放及之推意欲更廣其事又因祖珽輔政愛重之推又託鄧長顙漸說後主屬意斯文三年祖珽奏立文林館於是更召引文學士謂之待詔文林館焉珽又奏撰御覽詔珽及特進魏收太子太師徐之才中書令崔劼散騎常侍張彫中書監

陽休之監撰珽等奏追通直散騎侍郎韋道遜陸又太子舍人王劭衛尉丞李孝基殿中侍御史魏澹中散大夫劉仲威袁顛國子博士朱才奉車都尉陸道閑考功郎中崔子樞左外兵郎薛道衡并省主客郎中盧思道司空東閣祭酒崔德立太傅行參軍崔儼太學博士諸葛漢奉朝請鄭公超殿中侍御史鄭子信等入館撰書并勅放慤之推等同入撰例復命散騎常侍封孝琰前樂陵太守鄭元禮衛尉少卿杜臺卿通直散騎常侍楊訓前南兗州長史羊肅通直散騎侍郎馬元熙并省三公郎中劉珉開府行參軍李師上温君悠入館亦令撰書後復命特進崔季舒前仁州刺史劉逖散騎常侍李孝貞中書侍郎李德林續入待詔尋又詔諸人各舉所知又有前濟州長史李翥前廣武太守魏謩前西兗州司馬蕭漑前幽州長史陸仁惠鄭州司馬江旰前通直散騎侍郎辛德源陸開明通直郎封孝騫太尉掾張德冲并省右戶郎元行恭司徒戶曹參軍古道子前司空功曹參軍劉顓獲嘉令崔德儒給事中李元楷晉州中從事陽師孝太尉中兵參軍劉儒行司空祭酒陽辟疆司空士曹參軍盧公順司空中

兵參軍周子深開府行參軍王友伯崔君洽魏師譽並入館待詔又勅僕射殷孝言亦入焉御覽成後所撰錄人亦有不得待詔付所司處分者凡此諸人亦有文學膚淺附會親識妄相推薦者十三四焉雖然當時操筆之徒搜求略盡其外如廣平宋孝王信都劉善經輩三數人論其才性入館諸賢亦十三四不逮之周氏創業運屬陵夷纂遺文於既喪聘奇士如弗及是以蘇亮蘇綽盧柔唐瑾元偉李昶之徒咸奮鱗翼自致青紫然綽之建言務存質朴遂糠粃魏晉憲章虞夏雖屬辭有師古之美矯枉非適時之用故莫能常行焉既而革車電邁渚宮雲撤梁荆之風扇於關右狂簡之徒斐然成俗流宕忘反無所取裁夫人有六情稟五常之秀情感六氣順四時之序蓋文之所起情發於中而自漢魏以來迄乎晉宋其體屢變前哲論之詳矣暨永明天監之際太和天保之間洛陽江左文雅尤盛彼此好尚雅有異同江左宮商發越貴於清綺河朔詞義貞剛重乎氣質氣質則理勝其詞清綺則文過其意理深者便於時用文華者宜於詠歌此其南北詞人得失之大較也若能掇彼清音簡茲累句各去所短

合其兩長則文質彬彬盡美盡善矣梁自大同之後雅道淪缺漸乖典則爭馳
新巧簡文湘東啓其淫放徐陵庾信分路揚鑣其意淺而繁其文匿而彩詞尙
輕險情多哀思格以延陵之聽蓋亦亡國之音也隋文初統萬機每念斷彫爲
樸發號施令咸去浮華然時俗詞藻猶多淫麗故憲臺執法屢飛霜簡煬帝初
習藝文有非輕側暨乎卽位一變其體與越公書建東都詔冬至受朝詩及擬
飲馬長城窟並存雅體歸於典制雖意在驕淫而詞無浮蕩故當時綴文之士
遂得依而取正焉所謂能言者未必能行蓋亦君子不以人廢言也爰自東帝
歸秦逮乎青蓋入洛四隩咸泉九州攸同江漢英靈燕趙奇俊並該天網之中
俱爲大國之寶言刈其楚片善無遺潤水圓流不能十數才之難也不其然乎
時之文人見稱當世者則齊人范陽盧思道安平李德林河東薛道衡趙郡李
元操鉅鹿魏澹陳人會稽虞世基河東柳詒高陽許善心等或鷹揚河朔或獨
步漢南俱騁龍光並驅雲路矣魏書序袁躍裴敬憲盧觀封肅邢臧裴伯茂邢
昕溫子昇爲文苑傳今唯取子昇其餘並各附其家傳齊書敘祖鴻勳李廣樊

遜劉逖荀士遜顏之推爲文苑傳今唯取祖李樊荀其餘亦各附其家傳周書不立此傳今取王褒庾信列於此篇顏之推竟從齊入周故列在王庾之下顏之儀旣之推之弟故列在之推之末隋書序劉臻崔儻王頰諸葛穎王貞孫萬壽虞綽王胄庾自直潘徽爲文學傳今檢崔儻王頰孫萬壽各從其家傳其餘編之此篇并取虞世基許善心柳詵明克讓冠之於此以備文苑傳云

温子昇字鵬舉自云太原人晉大將軍嶠之後也世居江左祖恭之宋彭城王義康戶曹避難歸魏家于濟陰冤句因爲其郡縣人焉父暉兗州左將軍長史行濟陰郡事子昇初受學於崔靈恩劉蘭精勲以夜繼晝晝夜不倦長乃博覽百家文章清婉爲廣陽王深賤客在馬坊教諸奴子書作侯山祠堂碑文常景見而善之故詣深謝之景曰頃見温生深恠問之景曰温生是大才士深由是稍知之熙平初中尉東平王匡博召辭人以充御史同時射策者八百餘人子昇與盧仲宣孫搴等二十四人爲高第於是預選者爭相引決匡使子昇當之皆受屈而去搴謂人曰朝來靡旗亂轍者皆子昇逐北遂補御史時年二十二

臺中彈文皆委焉以憂去任服闋還爲朝請後李神雋行荊州事引兼錄事參軍被徵赴省神雋表留不遣吏部郎中李獎退表不許曰昔伯瑜之不應留王昶所以發歎宜速遣赴無踵彥雲前失於是還員及廣陽王深以東北道行臺召爲郎中黃門郎徐紇受四方表啓答之敏速於深獨沉思曰彼有溫郎中才藻可畏高車破走珍寶盈滿子昇取絹四十疋深軍敗子昇爲葛榮所得榮下都督和洛興與子昇舊識以數十騎潛送子昇得達冀州還京李楷執其手曰卿今得免足使夷甫慚德自是無復宦情閉門讀書厲精不已及孝莊卽位以子昇爲南主客郎中修起居注曾一日不直上黨王天穆時錄尙書事將加捶撻子昇遂逃遁天穆甚怒奏人代之莊帝曰當世才子不過數人豈容爲此便相放黜乃寢其奏及天穆將討邢杲召子昇同行子昇未敢應天穆謂人曰吾欲收其才用豈懷前忿也今復不來便須南走越北走胡耳子昇不得已而見之加伏波將軍爲行臺郎中天穆深知賞之元顥入洛天穆召子昇問曰卽欲向京師爲隨我北度對曰主上以武牢失守致此狼狽元顥新入人情未安今

往討之必有征無戰王若剋復京師奉迎大駕桓文之舉也捨此北度竊爲大王惜之天穆善之而不能用遣子昇還洛顥以爲中書舍人莊帝還宮爲顥任使者多被廢黜而子昇復爲舍人天穆每謂子昇曰恨不用卿前計除正員郎仍舍人及帝殺尒朱榮也子昇預謀當時赦詔子昇詞也榮入內遇子昇把詔書問是何文字子昇顏色不變曰勅榮不視之尒朱兆入洛子昇懼禍逃匿永熙中爲侍讀兼舍人鎮南將軍金紫光祿大夫遷散騎常侍中軍大將軍後領本州大中正梁使張臯寫子昇文筆傳於江外梁武稱之曰曹植陸機復生於北土恨我辭人數窮百六陽夏守傅標使吐谷渾見其國主牀頭有書數卷乃是子昇文也濟陰王暉業嘗云江左文人宋有顏延之謝靈運梁有沈約任昉我子昇足以陵顏轢謝舍任吐沈楊遵彥作文德論以爲古今辭人皆負才遺行澆薄險忌唯邢子才王元景温子昇彬彬有德素齊文襄引子昇爲大將軍諮議子昇前爲中書郎嘗詣梁客館受國書自以不修容止謂人曰詩章易作逋峭難爲文襄館客元僅曰諸人當賀推子昇合陳辭子昇久忸怩乃推陸操

焉及元僅劉思逸荀濟等作亂文襄疑子昇知其謀方使之作神武碑文既成乃餓諸晉陽獄食弊襦而死棄屍路隅沒其家口太尉長史宋游道收葬之又爲集其文筆爲三十五卷子昇外恬靜與物無競言有準的不妄毀譽而內深險事故之際好豫其間所以終致禍敗又撰永安記三卷無子弟子盛州主簿有文才年二十餘卒

荀濟字子通其先潁川人世居江左濟初與梁武帝布衣交知梁武當王然負氣不服謂人曰會楯上摩墨作檄文或稱其才於梁武梁武曰此人好亂者也濟又上書譏佛法言營費太甚梁武將誅之遂奔魏館于崔陵家及是見執楊愔謂曰遲暮何爲然濟曰叱叱氣耳何關遲暮乃下辯曰自傷年幾摧頽恐功名不立舍兒女之情起風雲之事故挾天子誅權臣齊文襄惜其才將不殺親謂曰荀公何意反濟曰奉詔誅將軍高澄何爲反於是燔殺之鄴下士大夫多傳濟音韻

祖鴻勳涿郡范陽人也父慎仕魏歷鴈門咸陽二郡太守政有能名卒於金紫

光祿大夫贈中書監幽州刺史諡惠侯鴻勳弱冠與同郡盧文符並爲州主簿僕射臨淮王彧表薦其文學除奉朝請人曰臨淮舉卿竟不相謝恐非其宜鴻勳曰爲國舉才臨淮之務祖鴻勳何事從而識之彧聞而喜曰吾得其人矣後咸陽王徽奏鴻勳爲司徒法曹參軍事及赴洛徽謂曰臨淮相舉竟不到門今來何也鴻勳曰今來赴職非爲謝恩轉廷尉正去官歸鄉里齊神武嘗徵至并州作晉祠記好事者翫其文位至高陽太守在官清素妻子不免寒餒時議高之齊天保初卒官

李廣字弘基范陽人也其先自遼東徙焉廣博涉羣書有才思少與趙郡李謩齊名爲邢魏之亞而訥於言敏於行中尉崔暹精選御史皆是世胄廣獨以才學兼侍御史修國史南臺文奏多其辭也齊文宣初嗣霸業命掌書記天保初欲以爲中書郎遇其病篤而止廣嘗欲早朝假寐忽驚覺謂其妻曰吾向似睡非睡忽見一人出吾身中語云君用心過苦非精神所堪今辭君去因而恍忽不樂數日便遇疾積年不起廣雅有鑒識度量弘遠坦率無私爲士流所愛時

共贍遺之賴以自給竟以疾終嘗薦畢義雲於崔暹廣卒後義雲集其文筆七卷託魏收爲之序

樊遜字孝謙河東北猗氏人也祖琰父衡並無官宦而衡性至孝喪父負土成墳植柏方數十畝朝夕號慕遜少好學其兄仲以造氈爲業亦常優饒之遜自責曰爲人弟獨愛安逸可不愧於心乎欲同勲事業母馮氏謂曰汝欲謹小行邪遜感母言遂專心典籍恆書壁作見賢思齊四字以自勸遜貌醜陋有才氣屬本州淪陷寓居鄴中爲臨漳小吏縣令裴鑿莅官清苦致白雀等瑞遜上清德頌十首鑿大加賞重擢爲主簿仍薦之於右僕射崔暹與遼東李廣勃海封孝琰等爲暹賓客人有譏其靜默不能趨時者遜常服東方朔之言陸沉世俗避世金馬遂借陸沉公子爲主人擬客難制客誨以自廣後崔暹大會客大司馬襄城王旭時亦在坐欲命府僚暹指遜曰此人學富才高兼之佳行可爲王參軍也旭目之曰豈能就耶遜曰家無蔭第不敢當此武定七年齊文襄崩暹爲文宣徙於邊賓客咸散遜遂徙居陳留梁州刺史劉殺鬼以遜兼錄事參軍

事遜仍舉秀才尚書案舊令下州三載一舉秀才爲三年已貢開封人鄭祖獻計至此年未合兼別駕王聰抗辭爭議右丞陽斐不能却尚書令高隆之曰雖遜才學優異待明年非遠遜竟還本州天保元年本州復召舉秀才三年春會朝堂對策策罷中書郎張子融奏入至四年五月遜與定州秀才李子宣等以對策三年不調被付外上書請從罷詔不報梁州重舉遜爲秀才五年正月制詔問焉尚書擢第以遜爲當時第一十二月清河王岳爲大行臺率衆南討以遜從軍明年文宣納梁貞陽侯蕭明爲梁主岳假遜大行臺郎中使于江南與蕭修侯瑱和解遜往還五日得修等報書岳因與修盟於江上大軍還鄴遜仍被都官尚書崔昂舉薦詔付尚書考爲清平勤幹送吏部七年詔令校定羣書供皇太子遜與冀州秀才高乾和瀛州秀才馬敬德許散愁韓同寶洛州秀才傅懷德懷州秀才古道子廣平郡孝廉李漢子勃海郡孝廉鮑長暄陽平郡孝廉景孫前梁州府主簿王九元前開府水曹參軍周子深等十一人同被尚書詔共刊定時祕府書籍紕繆者多遜乃議曰案漢中壘校尉劉向受詔校書每

一書竟表上輒言臣向書長水校尉臣參書太常博士書中外書合若干本以相比校然後殺青今所讎校供擬極重出自蘭臺御諸甲館向之故事見存府閣卽欲刊定必藉衆本太常卿邢子才太子少傅魏收吏部尙書辛術司農少卿穆子容前黃門郎司馬子瑞故國子祭酒李業興並是多書之家請牒借本參校祕書監尉瑾移尙書都坐凡所得別本三千餘卷五經諸史殆無遺闕于時魏收作庫狄干碑序令孝謙爲之銘陸卬不知以爲收合作也陸操伏渾卒楊愔使孝謙代己作書以告晉陽朝士令魏潤色之收不能改一字八年減東西二省官更定選員不過三百參者二三千人楊愔言於衆曰後生清俊莫過盧思道文章成就莫過樊孝謙几案斷割莫過崔成之遂以思道長兼員外郎三人並員外將軍孝謙辭曰門族寒陋訪第必不成乞補員外司馬督愔曰才高不依常例特奏用之清河初爲主書參典詔策天統元年加員外郎居七八日行遇轎車嘔眉下淚指方相曰何日更相煩君一到數日而卒雇方相送葬仍前所逢者孝謙死後定州秀才荀士遜繼爲主書才名相亞茹瞻字孝博東

安人南州舉秀才清朗剛直楊愔將用之曰今日之選不可無茹生卒於侍御史

荀士遜廣平人也好學有思理爲文清典見賞知音武定末舉司州秀才迄齊天保十年不調皇建中馬敬德薦爲主書轉中書舍人狀貌甚醜以文辭見重嘗有事須奏遇武成在後庭因左右傳通傳通者不得士遜姓名乃云醜舍人帝曰必士遜也看封題果是內人莫不歡笑累遷中書侍郎號爲稱職與李若等撰典言行於世齊亡年卒

王褒字子深琅邪臨沂人也曾祖儉祖騫父規並南史有傳褒識量淹通志懷沉靜美威儀善談笑博覽史傳七歲能屬文外祖梁司空袁昂愛之謂賓客曰此兒當成吾宅相弱冠舉秀才除祕書郎太子舍人梁國子祭酒蕭子雲褒之姑夫也特善草隸褒少以姻戚去來其家遂相模範而名亞子雲並見重於時武帝嘉其才藝遂以弟鄱陽王恢女妻之襲爵南昌縣侯歷位祕書丞宣城王文學安城內史及侯景陷建鄴褒輯寧所部見稱於時轉南平內史梁元帝嗣

位褻有舊召拜吏部尚書右僕射仍遷左丞兼參掌褻既名家文學優贍當時咸共推挹故位望隆重寵遇日甚而愈自謙損不以位地矜物時論稱之初元帝平侯景及禽武陵王紀後以建鄴凋殘時江陵殷盛便欲安之又其政府臣僚皆楚人也並願卽都鄴嘗召羣臣議之鎮軍將軍胡僧祐吏部尚書宗懍大府卿黃羅漢御史中丞劉毅等曰建鄴王氣已盡又荆南地又有天子氣遷徙非宜元帝深以爲然褻性謹慎知元帝多猜忌弗敢公言其非後因清閑密諫言辭甚切元帝意好荆楚已從僧祐等策竟不用及魏征江陵元帝授褻都督城西諸軍事柵破從元帝入金城俄而元帝出降褻遂與衆俱出見柱國于謹甚禮之褻曾作燕歌妙盡塞北寒苦之狀元帝及諸文士並和之而競爲悽切之辭至此方驗焉褻與王克劉毅宗懍殷不害等數十人俱至長安周文喜曰昔平吳之利二陸而已今定楚之功羣賢畢至可謂過之矣又謂褻及王克曰吾卽王氏甥也卿等並吾之舅氏當以親戚爲情勿以去鄉介意於是授褻及殷不害等車騎大將軍儀同三司常從容上席資餼甚厚褻等亦並荷恩賜

志羈旅焉周孝閔帝踐阼封石泉縣子明帝卽位篤好文學時褻與庾信才名最高特加親待帝每遊宴命褻賦詩談論恆在左右尋加開府儀同三司保定中除內史中大夫武帝作象經令褻注之引據該洽甚見稱賞褻有器局雅識政體旣累世在江東爲宰輔帝亦以此重之建德以後頗參朝議凡大詔冊皆令褻具草東宮旣建授太子少保遷少司空仍掌綸誥乘輿行幸褻常侍從初褻與梁處士汝南周弘讓相善及讓兄弘正自陳來聘帝許褻等通親知音問褻贈弘讓詩并書焉尋出爲宜州刺史卒於位子肅

庾信字子山南陽新野人祖易父肩吾並南史有傳信幼而俊邁聰敏絕倫博覽羣書尤善春秋左氏傳身長八尺腰帶十圍容止頽然有過人者父肩吾爲梁太子中庶子掌管記東海徐摛爲右衛率摛子陵及信並爲抄撰學士父子東宮出入禁闈恩禮莫與比隆旣文並綺豔故世號爲徐庾體焉當時後進競相模範每有一文都下莫不傳誦累遷通直散騎常侍聘于東魏文章辭令盛爲鄴下所稱還爲東宮學士領建康令侯景作亂梁簡文帝命信率宮中文武

千餘人營於朱雀航及景至信以衆先退臺城陷後信奔於江陵梁元帝承制除御史中丞及卽位轉右衛將軍封武康縣侯加散騎侍郎聘于西魏屬大軍南討遂留長安江陵平累遷儀同三司周孝閔帝踐阼封臨清縣子除司水下大夫出爲弘農郡守遷驃騎大將軍開府儀同三司司憲中大夫進爵義城縣侯俄拜洛州刺史信爲政簡靜吏人安之時陳氏與周通好南北流寓之士各許還其舊國陳氏乃請王褒及信等十數人武帝唯放王克殷不害等信及褒並惜而不遣尋徵爲司宗中大夫明帝武帝並雅好文學信特蒙恩禮至於趙滕諸王周旋款至有若布衣之交羣公碑誌多相託焉唯王褒頗與信埒自餘文人莫有逮者信雖位望通顯常作鄉關之思乃作哀江南賦以致其意大象初以疾去職隋開皇元年卒有文集二十卷文帝悼之贈本官加荆雍二州刺史子立嗣

顏之推字介珙邪臨沂人也祖見遠父協並以義烈稱世善周官左氏學俱南史有傳之推年十二遇梁湘東王自講莊老之推便預門徒虛談非其所好還

習禮傳博覽書史無不該洽辭情典麗甚爲西府所稱湘東王以爲其國右常侍加鎮西墨曹參軍好飲酒多任縱不修邊幅時論以此少之湘東遣世子方諸鎮郢州以之推爲中撫軍府外兵參軍掌管記遇侯景陷郢州頻欲殺之賴其行臺郎中王則以免景平還江陵時湘東卽位以之推爲散騎侍郎奏舍人事後爲周軍所破大將軍李穆重之送往弘農令掌其兄陽平公遠書翰遇河水暴長具船將妻子奔齊經砥柱之險時人稱其勇決文宣見悅之卽除奉朝請引於內館中侍從左右頗被顧眄後從至天泉池以爲中書舍人令中書郎段孝信將勅示之推之推營外飲酒孝信還以狀言文宣乃曰且停由是遂寢後待詔文林館除司徒錄事參軍之推聰穎機悟博識有才辯工尺牘應對閑明大爲祖珽所重令掌知館事判署文書遷通直散騎常侍俄領中書舍人帝時有取索恆令中使傳旨之推稟承宣告館中皆受進止所進文書皆是其封署於進賢門奏之待報方出兼善於文字監校繕寫處事勤敏號爲稱職帝甚加恩接爲勳要者所嫉常欲害之崔季舒等將諫也之推取急還宅故不連署

及召集諫人之推亦被喚入勤無名得免尋除黃門侍郎及周兵陷晉陽帝輕騎還鄴窘急計無所從之推因宦者侍中鄧長顙進奔陳策仍勸募吳士千餘人以爲左右取青徐路共投陳國帝納之以告丞相高阿那肱等阿那肱不願入陳乃云吳士難信勸帝送珍寶累重向青州且守三齊地若不可保徐浮海南度雖不從之推策然猶以爲平原太守令守河津齊亡入周大象末爲御史上士隋開皇中太子召爲文學深見禮重尋以疾終有文集三十卷撰家訓二十篇並行於世之推在齊有二子長曰思魯次曰敏楚蓋不忘本也之推集思魯自爲序

弟之儀字升幼穎悟三歲能讀孝經及長博涉羣書好爲詞賦嘗獻梁元帝荊州頌辭致雅贍帝手勅曰枚乘二葉俱得游梁應貞兩世並稱文學我求才子鯁慰良深江陵平之儀隨例遷長安周明帝以爲麟趾學士稍遷司書上士武帝初建東宮盛選師傅以之儀爲侍讀太子後征吐谷渾在軍有過行鄭譯等並以不能匡弼坐譴唯之儀以累諫獲賞卽拜小宮尹封平陽縣男宣帝卽位

遷上儀同大將軍御正中大夫進爵爲公帝後刑政乖僻昏縱日甚之儀犯顏驟諫雖不見納終亦不止深爲帝所忌然以恩舊每優容之及帝殺王軌之儀固諫帝怒欲并致之於法後以其諫直無私乃舍之宣帝崩劉昉鄭譯等矯遺詔以隋文帝爲丞相輔少主之儀知非帝旨拒而弗從昉等草詔署訖逼之儀署之儀厲聲謂昉等曰主上升遐嗣子幼冲阿衡之任宜在宗英方今賢戚之內趙王最長以親以德合膺重寄公等備受朝恩當盡忠報國奈何一旦欲以神器假人之儀有死而已不能誣罔先帝於是昉等知不可屈乃代之儀署而行之隋文帝後索符璽之儀又正色曰此天子之物自有主者宰相何故索之於是文帝大怒命引出將戮之然以其人望乃止出爲西疆郡守及踐極詔徵還京師進爵新野郡公開皇五年拜集州刺史在州清靜夷夏悅之明年代還遂優游不仕十年正月之儀例入朝文帝望而識之命引至御坐謂之曰見危受命臨大節而不可奪古人所難何以加卿乃賜錢十萬米一百石十一年卒

有文集十卷行於世

虞世基字懋世會稽餘姚人也父荔南史有傳世基幼恬靜喜愠不形於色博學有高才兼善草隸陳中書令孔奐見而歎曰南金之貴屬在斯人少傅徐陵聞其名召之世基不往後因公會陵一見而奇之顧朝士曰當今潘陸也因以弟女妻焉仕陳累遷尚書左丞陳主嘗於莫府山校獵令世基爲講武賦於坐奏之陳主嘉之賜馬一匹及陳滅入隋爲通直郎直內史省貧無產業每傭書養親怏怏不平嘗爲五言詩以見情文理悽切世以爲工作者無不吟詠未幾拜內史舍人煬帝卽位顧遇彌隆祕書監河東柳顧言博學有才罕所推謝至是與世基相見歎曰海內當共推此一人非吾儕所及也俄遷內史侍郎以母憂去職哀毀骨立有詔起令視事拜見之日殆不能起令左右扶之哀其羸瘠詔令進肉世基食輒悲哽不能下筋帝使謂曰方相委任宜爲國惜身前後敦勸者數矣帝重其才親禮逾厚專典機密與納言蘇威左翊衛大將軍宇文述黃門侍郎裴矩御史大夫裴蘊等參掌朝政時天下多事四方表奏日有百數帝方凝重事不廷決入閣之後始召世基口授節度世基至省方爲敕書日旦

百紙無所遺繆遼東之役進位金紫光祿大夫後從幸鴈門爲突厥所圍戰士多敗世基勸帝爲賞格親自撫循乃下詔停遼東事帝從之師乃復振及圍解勳格不行又下伐遼之詔由是言其詐衆朝野離心帝幸江都次鞏縣世基以盜賊日盛請發兵屯洛口倉以備不虞帝不從但答云卿是書生定猶恇怯于時天下大亂世基知帝不可諫正又以高頰張衡等相繼誅戮懼禍及己雖居近侍唯詔取容不敢忤意盜賊日甚郡縣多沒世基知帝惡數聞之後有告敗者乃抑損表狀不以實聞是後外間有變帝弗之知也常遣太僕卿楊義臣捕盜河北降賊數十萬列狀上聞帝歎曰我初不聞賊頓如此義臣列降賊何多也世基曰鼠竊雖多未足爲慮義臣剋之擁兵不少久在閩外此最非宜帝曰卿言是也遽追義臣放其兵散又越王侗遣太常丞元善達間行賊中詣江都奏事稱李密有衆數萬圍逼京都賊據洛口倉城內無食若陛下速還烏合必散不然者東都決沒因獻歎嗚咽帝爲改容世基見帝色憂進曰越王年小此輩誑之若如所言善達何緣得至帝勃然怒曰善達小人敢廷辱我因使經賊

中向東陽催運善達遂爲羣盜所殺此後外人杜口莫敢以賊聞奏世基氣貌沉審言多合意是以特見親愛朝臣無與爲比其繼室孫氏性驕淫世基惑之恣意奢靡彫飾器服無復素士之風孫復攜前夫子夏侯儼入世基舍而頑鄙無賴爲其聚斂鬻官賣獄賄賂公行其門如市金寶盈積其弟世南素國士而清貧不立未曾有所瞻由是爲論者所譏朝野咸共疾怨宇文化及之弑逆也世基乃見害長子肅好學才藝時人稱有家風弱冠早沒肅弟熙大業末爲符璽郎次子柔晦並宣義郎化及將亂之夕宗人虞伋知而告熙曰事勢已然吾將濟卿南度且得免禍同死何益熙曰棄父背君求生何地感尊之懷自此訣矣及難作兄弟競請先死行刑人先世基殺之

柳詵字顧言河東人也世仕江南居襄陽祖悛南史有傳詵少聰敏解屬文好讀書所覽將萬卷仕梁爲著作佐郎後蕭詧據荊州以爲侍中領國子祭酒吏部尚書及梁國廢拜開府爲內史侍郎以無吏幹轉晉王諮議參軍王好文雅招引才學之士諸葛穎虞世南王胄朱瑒等百餘人以充學士而詵爲之冠王

以師友處之每有文什必令其潤色然後示人嘗朝京還作歸藩賦命誓爲序詞甚典麗初王屬文數庾信體及見誓後文體遂變仁壽初引爲東宮學士加通直散騎常侍檢校洗馬甚見親重每召入臥內與之宴譴誓尤俊辯多在侍從有所顧問應答如響性嗜酒言雜誹諧由是彌爲太子所親狎以其好內典令撰法華玄宗爲二十卷上之太子大悅賞賜優洽儕輩莫比煬帝嗣位拜祕書監封漢南縣公帝退朝後便命入問言宴諷讀終日而罷帝每與嬪后對酒時逢興會輒遣命之至與同榻共席恩比友朋常猶恨不能夜召乃命匠刻木爲偶人施機關能坐起拜伏以像誓帝每月下對飲酒輒令宮人置於座與相酬酢而爲歡笑從幸揚州卒帝傷惜者久之贈大將軍諡曰康誓撰晉王北伐記十五卷有集十卷行於世

許善心字務本高陽北新城人也祖茂父亨並南史有傳善心九歲而孤爲母范氏所鞠養幼聰明有思理所聞輒能記多聞默識爲當世所稱家有舊書萬餘卷皆徧通涉十五解屬文爲牋上父友徐陵大奇之謂人曰此神童也太

子詹事江總舉秀才對策高第授度支郎中補撰史學士貞明二年加通直散騎常侍聘隋遇文帝伐陳禮成而不獲反命累表請辭上不許留繫賓館及陳亡上遣使告之善心素服號哭於西階下藉草東向經三日敕書唁焉明日有詔就館拜通直散騎常侍賜衣一襲善心哭盡哀入房改服復出北面立垂涕再拜受詔明日乃朝服泣於殿下悲不能與上顧左右曰我平陳國唯獲此人既能懷其舊君卽我誠臣也敕以本官直門下省賜物千段草馬二十匹後幸太山還授虞部侍郎十六年有神雀降於含章闈上召百官賜宴告以此瑞善心於坐請紙筆製神雀頌奏之上甚悅曰我見神雀共皇后觀之今且召公等入適述此事善心於坐始知卽能成頌文不加點筆不停毫常聞此言今見其事因賜物二百段十七年除祕書丞時祕藏圖籍尙多淆亂善心效阮孝緒七錄更制七林各總敘冠於篇首又於部錄之下明作者之意區分類例焉又奏追李文博陸從典等學者十許人正定經史錯謬仁壽元年攝黃門侍郎二年加攝太常少卿與牛弘等議定禮樂祕書丞黃門並如故四年留守京師帝崩

于仁壽宮煬帝祕不發喪先易留宮人出除巖州刺史逢漢王諒反不之任大業元年轉禮部侍郎奏薦儒者徐文遠爲國子博士包愷陸德明褚徽魯世達之輩並加品秩授爲學官其年副納言楊達爲冀州道大使以稱旨賜物五百段左衛大將軍宇文述每日借本部兵數十人以供私役常半日而罷御史大夫梁毗奏劾之上方以腹心委述初付法官推千餘人皆稱被役經二十餘日法官候伺上旨乃言役不滿日其數雖多不合通計縱令有實亦無罪諸兵士聞之更云初不被役上欲釋之付議虛實百寮咸議爲虛善心以爲述於仗衛之所抽兵私役雖不滿日闕於宿衛與常役所部情狀乃殊又兵多下番散還本府分道追至不謀同辭今殆一月方始翻覆姦狀分明此何可捨蘇威楊汪等二十餘人同善心議其餘皆議免罪煬帝可免者之奏後數月述譖善心曰陳叔寶卒善心共周羅喉虞世基袁充蔡徵等同往送葬善心爲祭文謂爲陛下敢於今日加叔寶尊號召問有實自援古例事得釋而甚惡之又太史奏帝卽位年與堯時符合善心議以國哀甫爾不宜稱賀述諷御史劾之左遷給事

郎降品三等四年撰方物志奏之七年從至涿郡帝方自御戎以東討善心上封事忤旨免官其年復徵守給事郎帝嘗言及文帝受命之符因問鬼神之事敕善心與崔祖濬撰靈異記十卷初善心父撰著梁史未就而歿善心述成父志修續家書其序傳末述制作之意曰謹按太素將萌洪荒初判乾儀資始辰象所以正時坤載厚生品物於焉播氣參三才而育德肖二統而降靈有黎人焉爲之君長有貴賤矣爲其宗極保上天之睠命膺下土之樂推莫不執大方振長策感召風雲驅馳英俊干戈揖讓取之也殊功鼎玉龜符成之也一致革命剗制竹素之道稍彰紀事記言筆墨之官漸著炎農以往存其名而漏其迹黃軒以來晦其文而顯其質登丘納麓具訓誥及典謨貫昴入房傳夏正與殷祀洎辨方正位論時計功南北左右兼四各之別禱机乘車擅一家之稱國惡雖諱君舉必書故賊子亂臣天下大懼元龜明鏡昭然可察及三郊遞襲五勝相泐俱稱百谷之王並以四海自任重光累德何世無哉逮有梁之興君臨天下江左建國莫斯爲感受命在於一君繼統傳乎四主克昌四十八載餘祚五

十六年武皇帝出自諸生爰升寶歷拯百王之弊救萬姓之危反澆季之末流
登上皇之獨道朝多君子野無遺賢禮樂必備憲章咸舉弘深慈於不殺濟大
忍於無刑蕩蕩巍巍可爲稱首屬陰戎入潁羯胡侵洛沸騰塹黷三季之所未
聞掃地滔天一元之所巨厄廊廟有序翦成狐兔之場珪帛有儀碎夫犬羊之
手福善積而身禍仁義存而國亡豈天道歟豈人事歟常別論之在於序論之
卷先君昔在前代早懷述作凡撰齊書爲五十卷梁書記傳隨事勒成及闕而
未就者目錄注爲一百八卷梁室交喪墳籍銷盡冢壁皆殘不準無所盜惟囊
同毀陳農何以求秦儒旣坑先王之道將墜漢臣徒請口授之文亦絕所撰之
書一時亡散有陳初建詔爲史官補闕拾遺心識口誦依舊目錄更加修撰且
成百卷已有六帙五十八卷上祕閣訖善心早嬰荼蓼弗克荷薪太建之末頻
抗表聞至德之初蒙授史任方願緇素採訪門庭記錄俯勵弱才仰成先志而
單宗少強近虛室類原顏退屏無所交游棲遲不求進益假班嗣之書徒聞其
語給王隱之筆未見其人加以庸瑣涼能孤陋末學參職郎署兼撰陳史致此

書延時未卽成續禎明二年以臺郎入聘屬本邑淪覆他鄉播遷行人失時將命不復望都亭而長慟遷別館而懸壺家史舊書在後蕩盡今止有六卷獲存又並缺落失次自入京邑以求隨見補葺略成七十卷四帝紀八卷后妃一卷三太子錄一卷爲一帙十卷宗室王侯列傳一帙十卷具臣列傳二帙二十卷外戚傳一卷孝德傳一卷誠臣傳一卷文苑傳二卷儒林傳二卷逸人傳一卷數術傳一卷藩臣傳一卷合一帙十卷止足傳一卷列女傳一卷權幸傳一卷羯賊傳二卷逆臣傳二卷叛臣傳二卷敘傳論述一卷合一帙十卷凡稱史臣者皆先君所言下稱名案者皆善心補闕別爲敘論一篇託于敘傳之末十年又從至懷遠鎮加授朝散大夫突厥圍鴈門攝左親侍武賁郎將領江南兵宿衛殿省駕幸江南追敘前勳授通議大夫詔還本品行給事郎十四年化及弒逆之日隋官盡詣朝堂謁賀善心獨不至許弘仁馳告曰天子已崩宇文將軍攝政合朝文武莫不咸集天道人事自有代終何預叔而低徊若此善心怒之不肯隨去弘仁返走上馬泣而言曰將軍於叔全無惡意忽自求死豈不痛哉

還告唐奉議以狀白化及遣人就宅執至朝堂化及令釋之善心不舞蹈而出化及目送之曰此大負氣命捉來罵云我好欲放你敢如此不遜其黨輒牽曳遂害之及越王稱制贈左光祿大夫封高陽縣公諡曰文節善心母范氏梁太子中舍人孝才之女也少寡養孤博學有高節隋文帝知之敕尚食每獻時新常遣分賜嘗詔范入內侍皇后講讀封永樂郡君及善心遇禍范氏九十有二臨喪不哭撫柩曰能死國難我有兒矣因臥不食後十餘日亦終

李文博博陵人性貞介鯁直好學不倦至於教義名理特所留心每讀書至安危得失忠臣烈士未嘗不反覆吟翫開皇中爲羽騎尉特爲吏部侍郎薛道衡所知恆令在聽事帷中披檢書史并察已行事若遇政教善事卽抄撰記錄如選用疎謬卽委之臧不道衡每得其語莫不忻然從之後直祕書內省典校羣籍守道居貧晏如也雖衣食乏絕而清操愈厲不妄通賓客恆以禮法自處儕輩莫不敬焉道衡知其貧每延于家給以資費文博商略古今政教得失如指諸掌然無吏幹稍遷校書郎出爲縣丞遂得下考數歲不調道衡爲司隸大夫

遇之東都尚書省甚嗟愍之奏爲從事因謂齊王司馬李綱曰今日遂遇文博得奏用之以爲歡笑其見賞知音如此在洛下曾詣房玄齡相送出衢路玄齡謂曰公生平志尚唯在正直今旣得爲從事故應有會素心比來激濁揚清所爲多少文博遂奮臂厲聲曰夫清其流者必潔其源正其末者須端其本今政源混亂雖曰免十_一貪郡守亦何所益其率直疾惡不知忌諱皆如此類時朝政浸壞人多賊賄唯文博不改其操論者以此貴之遭亂播遷不知所終初文博在內省校書虞世基子亦在其內盛飾容服而未有所知文博因從容問之年紀答云十八文博乃謂曰昔賈誼當此之年議論何事君今徒事儀容欲何爲者又秦孝王妃生男文帝大嘉頒賜羣官各有差文博家道屢空人謂其悅賞乃云賞罰之設功過所歸今王妃生男於羣官何事乃妄受賞也其循名責實錄過計功必使賞罰不濫功過無隱皆爾文博本爲經學後讀史書於諸子及論尤所該洽性長議論亦善屬文著政道集十卷大行於世開皇中又有魏郡侯白字君素好學有捷才性滑稽尤辯俊舉秀才爲儒林郎通悅不持威儀好

爲俳諧雜說人多愛狎之所在處觀者如市楊素甚狎之素嘗與牛弘退朝白謂素曰日之夕矣素大笑曰以我爲牛羊下來邪文帝聞其名召與語悅之令於祕書修國史每將擢用輒曰白不勝官而止後給五品食月餘而死時人傷其薄命著旌異記十五卷行於世

明克讓字弘道平原鬲人也世仕江左祖僧紹父山賓並南史有傳克讓少儒雅善談論博涉書史所覽將萬卷三禮論語尤所研精龜策歷象咸得其要年十四釋褐湘東王法曹參軍時舍人朱异在儀賢堂講老子克讓預焉堂邊有修竹异令克讓詠之克讓覽筆輒成卒章曰非君多愛賞誰貴此貞心异甚奇之仕梁位中書侍郎梁滅歸長安引爲麟趾殿學士周武帝卽位爲露門學士令與太史官屬正定新歷累遷司調大夫賜爵歷城縣伯隋文帝受禪位率更令進爵爲侯太子以師道處之恩禮甚厚每有四方珍味輒以賜之時東宮盛徵天下才學士至於博物洽聞皆出其下詔與太常牛弘等修禮議樂當朝典故多所裁正以疾去官加通直散騎常侍卒上甚惜之二宮贈賻甚厚所著孝

經義疏一部古今帝代記一卷文類四卷續名僧記一卷集二十卷子餘慶位
司門郎越王侗稱制爲國子祭酒克讓叔少遐博涉羣書有詞藻仕梁位都官
尙書入齊甚爲名流王元景陽休之等所禮皇建中拜中庶子卒贈中書令揚
州司馬

劉臻字宣摯沛國相人也父顯南史有傳臻年十八舉秀才爲邵陵王東閣祭
酒元帝時遷中書舍人江陵平歸魏爲中書侍郎周冢宰宇文護辟爲中外府
記室軍書羽檄多成其手後爲露門學士授大都督封饒陽縣子歷藍田令畿
伯下大夫隋文帝受禪進位儀同三司左僕射高頰之伐陳也以臻隨軍主文
翰進爵爲伯皇太子勇引爲學士甚親狎之臻無吏幹又性惚恍耽經覃思至
於世事多所遺忘有劉訥者亦任儀同俱爲太子學士情好甚密臻住城南訥
住城東臻嘗欲尋訥謂從者曰汝知劉儀同家乎從者不知尋訥謂臻還家因
答曰知於是引之而去旣扣門臻尙未悟謂至訥家乃據鞍大呼曰劉儀同可
出矣其子迎門臻驚曰汝亦來邪其子答曰此是大人家於是顧眙久之乃悟

叱從者汝大無意吾欲造劉訥耳性好啗蜺以音同父諱呼爲扁螺其疎放多此類也精於兩漢書時人稱爲漢聖開皇十八年卒有集十卷行於世

諸葛穎字漢丹陽建康人也祖銓梁零陵太守父規義陽太守穎年十八能屬文起家邵陵王參軍事轉記室侯景之亂奔齊歷學士太子舍人周氏平齊不得調杜門不出者十餘年習易圖緯蒼雅莊老頗得其要清辯有俊才晉王廣素聞其名引爲參軍事轉記室及王爲太子除藥藏郎煬帝卽位遷著作郎甚見親倖出入臥內帝每賜之曲宴輒與皇后嬪御連席共榻穎因間隙多所譖毀是以時人謂之冶葛後錄恩舊授朝散大夫帝嘗賜穎詩其卒章曰參翰長洲苑侍講肅成門名理窮研覈英華恣討論實錄資平允傳芳導後昆其待遇如此從征吐谷渾加正議大夫從駕北巡卒於道穎性褊急與柳謦每相忿鬪帝屢責怒之而猶不止於後帝亦薄之有集二十卷撰鑿駕北巡記三卷幸江都道里記一卷洛陽古今記一卷馬名錄二卷並行於世有子嘉會

王貞字孝逸梁郡陳留人也少聰敏七歲好學善毛詩禮記左氏傳周易諸史

百家無不畢覽善屬文不事產業每以諷讀爲娛開皇初汴州刺史樊叔略引爲主簿後舉秀才授縣尉非其好也謝病于家煬帝卽位齊王暕鎮江都聞其名以書召之及至以客禮待之索其文集貞上三十三卷爲啓陳謝齊王覽集甚善之賜良馬四匹貞復上江都賦王賜錢十萬貫良馬二匹未幾以疾甚還鄉終於家

虞綽字士裕會稽餘姚人也父孝曾陳始興王諮議綽身長八尺姿儀甚偉博學有俊才尤工草隸陳左衛將軍傅縡有盛名於世見綽詞賦歎美之仕陳爲太學博士遷永陽王記室及陳亡晉王廣引爲學士大業初轉爲祕書學士奉詔與祕書郎虞世南著作佐郎庾自直等撰長洲玉鏡等書十餘部綽所筆削帝未嘗不稱善而官竟不遷初爲校書郎以藩邸左右授宣惠尉遷著作佐郎與虞世南庾自直蔡允恭等四人常直禁中以文翰待詔恩眄隆洽從征遼東帝舍臨海頻見大鳥異之詔綽爲銘帝覽而善之命有司勒於海上以度遼功授建節尉綽恃才任氣無所降下著作郎諸葛穎以學業倖於帝綽每輕侮之

由是有隙帝嘗問綽於頴頴曰虞綽龔疎人也帝領之時禮部尚書楊玄感稱其貴踞虛己禮之與結布衣之友綽數從之遊其族人虞世南誠之曰上性猜忌而君過厚玄感若與絕交者帝知君改悔可以無咎不然終當見禍綽不從尋有告綽以禁內兵書借玄感帝甚銜之及玄感敗其妓妾並入宮帝因問之曰玄感平常時與何人交往其妾以虞綽對帝令大理卿鄭善果窮理其事綽曰羈旅薄游與玄感文酒談款實無他謀帝怒不解徙綽于邊綽至長安而亡吏逮之急於是潛度江變姓名自稱吳卓游東陽抵信安令天水辛大德舍歲餘綽與人爭田相訟因有讖綽者而告之竟爲吏所執坐斬江都所有詞賦並行於世大德爲令誅翦羣盜甚得人和與綽俱爲使者所執其妻泣曰每諫君無匿學士今日之事豈不哀哉大德笑曰我本圖脫長者乃爲人告之吾罪也當死以謝綽會有詔死罪得以擊賊自効信安吏人詣使者叩頭曰辛君人命所懸不然亦無信安矣使者留之以討賊帝怒斬使者大德獲全

王胄字承基琅邪臨沂人也祖筠父祥並南史有傳胄少有逸才仕陳歷太子

舍人東陽王文學及陳滅晉王廣引爲博士仁壽末從劉方擊林邑以功授帥都督大業初爲著作佐郎以文詞爲煬帝所重帝嘗自東宮還京師賜天下大酺四日爲五言詩詔羣官詩成者奏之帝覽胄詩而善之因謂侍臣曰氣高致遠歸之於胄詞清體潤其在世基意密理新惟庾自直過此者未可以言詩也帝所有篇什多令繼和與虞綽齊名同志友善于時後進之士咸以二人爲準的從征遼東進授朝散大夫胄性疎率不倫自恃才伐鬱鬱於官每負氣陵傲忽略時人爲諸葛穎所嫉屢譖之於帝帝愛其才而不罪禮部尙書楊玄感虛襟與交數游其第及玄感敗與虞綽徙邊胄遂亡匿潛還江左爲吏所捕坐誅所著詞賦多行於世

兄脊字元恭博學多通少有盛名於江左仕陳歷太子洗馬中舍人陳亡與胄俱爲學士煬帝卽位授祕書郎卒於官

庾自直潁川人父持南史有傳少好學沉靜寡欲仕陳歷豫章王府外兵參軍記室陳亡入關不得調晉王廣聞之引爲學士大業初授著作佐郎自直解屬

文於五言詩尤善性恭慎不妄交游特爲帝所愛有篇章必先示自直令其詆訶自直所難帝輒改之或至於再三俟其稱善然後方出其見親禮如此後以本官知起居舍人事化及作逆與之北上自載露車中感激發病卒有文集十卷行於世

潘徽字伯彥吳郡人也性聰敏少受禮於鄭灼受毛詩於施公受書於張冲講莊老於張譏並通大義尤精三史善屬文能持論中書令江總引致文儒之士徽一詣總甚敬之釋褐新蔡王國侍郎選爲客館令隋遣魏澹聘于陳陳人使徽接對之澹將反命爲啓於陳主曰敬奉弘慈曲垂餞送徽以餞送爲重敬奉爲輕却其啓而不奏澹曰曲禮云主敬客詩曰維桑與梓必恭敬止孝經宗廟致敬又云不敬其親謂之悖禮孔子敬天之怒成湯聖敬日躋宗廟極重上天極高父極尊君極貴四者咸同一敬五經未有異文不知以敬爲輕竟何所據徽難之曰向所論敬字本不全以爲輕但施用處殊義成通別禮主於敬此是通言猶如男子冠而字之注云成人敬其名也春秋有冀缺夫妻亦云相敬於

子則有敬名之義在夫亦有敬妻之說此可復並謂極高極尊乎至若敬謝諸公固非尊地公子敬愛止施賓友敬問敬報彌見雷同敬聽敬酬何關貴隔當知敬之爲義雖是不輕但敬之於語則有時混漫今云敬奉所以成疑聊舉一隅未爲深據澹不能對遂從而改焉及陳滅爲州博士秦王俊聞其名召爲學士嘗從俊朝京師在塗令徽於馬上爲賦行一驛而成其名曰述恩賦俊覽而善之復令爲萬字文又遣撰集字書名爲韻纂徽爲之序俊薨晉王廣復引爲揚州博士令與諸儒撰江都集禮一部復令徽爲序煬帝嗣位徽與著作郎陸從典太常博士褚亮歐陽詢等助越公楊素撰魏書會素薨而止授京兆郡博士楊玄感兄弟重之數相往來及玄感敗凡所交關多懼其患徽以玄感故人爲帝所不悅有司希旨出徽爲西海郡威定縣主簿意甚不平行至隴頭發病而卒隋時有常得志尹式劉善經祖君彥孔德紹劉斌並有才名事多遺逸常得志京兆人隋秦王記室及王薨過故第爲五言詩辭理悲壯甚爲時人所重復爲兄弟論義理可稱

尹式河間人仁壽中官至漢王記室漢王阻兵式自殺其族人正卿彥卿亦俱有雋才名顯於世

劉善經河間人歷著作佐郎太子舍人著酬德傳三十卷諸劉譜三十卷四聲指歸一卷行於世

祖君產見其父珽傳

孔德紹會稽人有清才官至京城縣丞竇建德署爲中書令專典書檄及建德敗伏誅

劉斌南陽人祖之遴南史有傳斌頗有詞藻官至信都同功書佐竇建德署爲中書舍人建德敗復爲劉黑闥中書侍郎與黑闥亡歸突厥不知所終

論曰古人之所貴名不朽者蓋重言之尙存王褒庾信顏之推虞世基柳詵許善心明克讓劉臻王貞虞綽王胄等並極南土譽望又加之以才名其爲貴顯固其宜也自餘或位下人微居常亦何能自達及其靈虵可握天網俱頓並編緗素咸貫辭林雖其位可下其身可殺千載之外貴賤一焉非此道也孰云能

致凡百士子可不務乎

北史卷八十三

北

史

卷八十三

列傳

三

中華書局聚

北史卷八十三考證

文苑傳敘宋該封弈朱彤梁讜之屬○弈監本訛躒今改從南本

比於建安之徐陳應劉元元之豫張左東各一時也○元元當係元康之訛今各本俱同仍之

通直散騎常侍楊訓○齊書楊作王又下文李師上作李師正魏審作魏審封孝騫作封孝審

祖鴻勳傳臨淮舉卿竟不相謝恐非所宜○恐監本訛不今改從閣本

樊遜傳遜常服東方朔之言○遜監本誤遊今改從南本

大司馬襄城王旭○城監本訛成今改從齊書

王褒傳宣城王文學安城內史○宣城周書作宣成考列傳宣成王名大器簡文帝子也又安城內史作安成郡守

褒曾作燕歌妙盡塞北寒苦之狀○燕歌下周書有行字又狀監本訛言今從

周書改正

北

史卷八十三考證

一中華書局聚

庾信傳父子東宮出入禁闥○周書東宮上有在字

顏之推傳父協○協齊書作勰

後從至天泉池○天監本訛大今從南本改正又齊書無泉字

虞世基傳字懋世○懋隋書作茂

日旦百紙無所遺繆○旦隋書作且

許善心傳先易留宮人出除巖州刺史○留字下隋書有守字蓋承上文善心

留守京師而言也

三季之所未聞○此與下文一元之所巨厄句隋書本無兩所字

權幸傳一卷○幸監本作宰今從隋書及南本

李文博傳相送出衢路○出隋書作於

劉臻傳臻驚曰汝亦來耶○驚監本訛警今改從隋書

虞綽傳陳左衛將軍傅緯○傅監本訛傳今改從隋書

王胄傳從征遼東進授朝散大夫○從監本訛徙今改從隋書

潘徽傳令徽於馬上爲賦行一驛而成○行一驛而四字監本作闕三字南本
作一行賦三字皆訛也今從隋書增入

常得志傳過故第爲五言詩○第隋書作宮監本誤第今改從南本

北史卷八十三考證

洪武八年十二月

行一各處三

本志

...

北史卷八十四

唐

李

延

壽

撰

列傳第七十二

孝行

長孫慮

乞伏保

孫益德

董洛生

楊引

閻元明

吳悉達

王續生

李顯達

倉跋

張昇

王崇

郭文恭

荆可

秦族

皇甫遐

張元

王頌

弟頌

楊慶

田翼

紐因

劉仕儁

翟普林

華秋

徐孝肅

孝經云夫孝天之經也地之義也人之行也論語云君子務本本立而道生孝悌也者其為仁之本歟呂覽云夫孝三皇五帝之本務萬事之綱紀也執一術

而百善至百邪去天下順者其唯孝乎然則孝之爲德至矣其爲道遠矣其他
人深矣故聖帝明王行之於四海則與天地合其德與日月齊其明諸侯卿大
夫行之於國家則永保其宗社長守其祿位匹夫匹婦行之於閭閻則播徽烈
於當年揚休名於千載是以堯舜湯武居帝王之位垂至德以敦其風孔墨荀
孟稟聖賢之資弘正道以勵其俗觀其所由在此而已矣然而淳源既往澆風
愈扇禮義不樹廉讓莫脩若乃縮銀黃列鐘鼎立於朝廷之間非一族也積龜
貝實倉廩居於閭巷之內非一家也其於愛敬之道則有未能備焉哀思之節
罕有得其中焉斯乃詩人所以思素冠孔門有以責衣錦也且生盡色養之方
終極哀思之地厥迹多緒其心一焉若乃誠達泉魚感通鳥獸事匪常倫斯蓋
希矣至如温牀扇席灌樹負土苟或加人咸爲疾俗斯固仁人君子所以興歎
哲后賢宰所宜屬心如令明教化以救其弊優爵賞以勸其心存懇誠以誘其
進積歲月以求其終則今之所謂少者可以爲多矣古之所謂難者可以爲易
矣長孫慮等闕稽古之學無俊偉之才或任其自然情無矯飾或篤於天性勤

其四體並竭股肱之力咸盡愛敬之心自足膝下之歡忘懷軒冕之貴不言而化人神通感雖或位登台輔爵列王侯祿積萬鍾馬跡千駟死之日曾不得與斯人之徒隸齒孝之大也不其然乎案魏書列趙琰長孫慮乞伏保孫益德董洛生楊引闔元明吳悉達王續生李顯達倉跋張昇王崇郭文恭爲孝感傳周書列李棠柳檜杜叔毗荆可秦族皇甫遐張元爲孝義傳隋書列陸彥師田德懋薛濬王頌田翼楊慶郭世俊紐因劉仕儁郎方貴翟普林李德饒華秋徐孝肅爲孝義傳今趙琰李棠柳檜杜叔毗陸彥師李德饒入別傳及其家傳其餘並從此編輯以備孝行傳云

長孫慮代人也母因飲酒其父真呵叱之誤以杖擊便卽致死真爲縣囚執處以重坐慮列辭尙書云父母忿爭本無餘惡直以謬誤一朝橫禍今母喪未殯父命旦夕慮兄弟五人並沖幼慮身居長今年十五有一女弟向始四歲更相鞠養不能保全父若就刑交墜溝壑乞以身代老父命使嬰弱衆孤得蒙存立尙書奏云慮於父爲孝子於弟爲仁兄尋情究狀特可矜感孝文帝詔特恕其

父死罪以從遠流

乞伏保高車部人也父居獻文時爲散騎常侍領牧曹尚書賜爵寧國侯以忠謹慎密常在左右出內詔命賜宮人河南宗氏亡後賜以宮人申氏宋太子左率申坦兄女也歲餘居卒申撫養伏保性嚴肅捶罵勿至而伏保奉事孝謹初無恨色襲父侯爵例降爲伯稍遷左中郎將每請祿賜在外公私尺丈所用無不白知出爲無善鎮將申年踰八十伏保手製馬輿親自扶接申欣然隨之申亡伏保解官奉喪還洛復爲長兼南中郎將卒

孫益德樂安人也其母爲人所害益德童幼爲母復仇還家哭於殯以待縣官孝文文明太后以其幼而孝決又不逃罪特免之

董洛生代人也居父喪過禮詔遣祕書中散温紹伯奉璽書慰之令自抑割以全孝道又詔其宗親使相喻獎勿令有滅性之譏

楊引鄉郡襄人也三歲喪父爲叔所養母年九十二終引年七十五哀毀過禮三年服畢恨不識父追服斬衰食粥麤服誓終身命經十三年哀慕不改爲郡

縣鄉閭三百餘人上狀稱美有司奏宜旌賞復其一門樹其純孝詔別勅集書標揚引至行又可假以散員之名

閻元明河東安邑人也少而至孝行著鄉閭太和五年除北隨郡太守元明以違離親養與言悲慕母亦慈念泣淚喪明悲號上訴許歸奉養一見其母母目便開刺史呂壽恩列狀上聞詔下州郡表爲孝門復其租調兵役令終母年母亡服終心喪積載每忌日悲動傍鄰昆弟雍和尊卑諧穆安貧樂道白首同歸又猗氏縣人令狐仕兄弟四人早喪父泣慕十載奉養其母孝著鄉邑而力田積粟博施不已又河東郡人楊風等七百五十人列稱樂戶皇甫奴兄弟雖沉屈兵伍而操尙彌高奉養繼親甚著恭孝之稱又東郡小黃縣人董吐渾兄養事親至孝三世同居閨門有禮景明初畿內大使王凝奏請標異詔從之

吳悉達河東聞喜人也兄弟三人年並幼小父母爲人所殺四時號慕悲感鄉隣及長報仇避地永安昆弟同居四十餘載閨門和睦讓逸競勞雖於儉年糊餽不繼賓客經過必傾所有每守宰殯喪私辦車牛送終葬所鄰人孤貧窘困

者莫不解衣輟糧以相賑恤鄉閭五百餘人詣州稱頌焉刺史以悉達兄弟行著鄉里板贈悉達父勃海太守悉達後欲改葬亡失墳墓推尋弗獲號哭之聲晝夜不止叫訴神祇忽於悉達足下地陷得父銘記因遷葬曾祖已下三世九喪傾盡資業不假於人哀感毀悴有過初喪有司奏聞標閭復役以彰孝義時有齊州人崔承宗其父於宋世仕漢中母喪因殯彼後青徐歸魏遂爲隔絕承宗性至孝萬里投險偷路負喪還京師黃門侍郎孫惠蔚聞之曰吾於斯人見廉范之情矣於是弔贈盡禮如舊相識

王續生滎陽京縣人也遭繼母憂居喪杖而後起及終禮制鬢髮盡落有司奏聞宣武詔標旌門閭甄其徭役

李顯達潁川陽翟人也父喪水漿不入口七日鬢髮墮落形體枯悴六年廬於墓側哭不絕聲殆於滅性州牧高陽王雍以狀奏靈太后詔表其門閭

倉跋滎陽京縣人也喪母水漿不入口五日吐血數升居憂毀瘠見稱州里有司奏聞孝武帝詔標門閭

張昇滎陽京縣人也喪父飲水絕鹽哀毀過度形骸枯悴骨立而已髮落殆盡
聲聞鄉里盜賊不侵其閭州表以聞標其門閭

王崇字乾邕陽夏雍丘人也兄弟並以孝稱身勤稼穡以養二親仕梁州鎮南
府主簿母亡杖而後起鬢髮墮落未及葬權殯宅西崇廬於殯所晝夜哭泣鳩
鵠羣至有一小鳥素質黑眸形大於雀栖於崇廬朝夕不去母喪闋復丁父憂
哀毀過禮是年夏風雹所經處禽獸暴死草木摧折至崇田畔風雹便止禾麥
十頃竟無損落及過崇地風雹如初咸稱至行所感崇雖除服仍居墓側於其
室前生草一根莖葉甚茂人莫能識至冬中復有鳥巢崇屋乳養三子毛羽成
長馴而不驚守令聞之親自臨視州以聞奏標其門閭

郭文恭太原平遙人也仕爲太平縣令年踰七十父母喪亡文恭孝慕罔極乃
居祖父墓次晨夕拜跪跣足負土培祖父二墓寒暑竭力積年不已見者莫不
哀歎尙書聞奏標其門閭

荆可河東猗氏人也性質朴容止有異於人能苦身勤力供養其母隨時甘旨

終無匱乏母喪水漿不入口三日悲號擗踴絕而後蘇者數四葬母之後遂廬於墓側晝夜悲哭負土成墳蓬髮不櫛菜食飲水而已然可家舊墓塋域極大榛蕪至深去家十餘里而可獨宿其中與禽獸雜處哀感遠近邑里稱之大統中可鄉人以可孝行足以勸勵風俗乃上言焉周文令州縣表異之及服終之後猶若居喪大冢宰晉公護聞可孝行特引見焉與可言論時有會於護意而護亦至孝其母閻氏沒於敵境不測存亡每見可自傷久乖膝下而重可至性可卒後護猶思其純孝收可妻子於京城恆給其衣食

秦族上郡洛川人也祖白父藿並有至性聞於閩里魏太和中板白潁州刺史大統中板藿鄜城郡守族性至孝事親竭力及父喪哀毀過禮每一慟哭酸感行路既以母在恆抑割哀情以慰其母意四時珍羞未嘗匱乏與弟榮先復相友愛閨門之中怡怡如也尋而其母又沒哭泣無時唯飲水食菜而已終喪之後猶蔬食不入房室二十許年鄉里咸歎異之其邑人王元達等七十餘人上其狀有詔表其門閻榮先亦至孝遭父喪哀慕不已遂以毀卒邑里化其孝行

周文嘉之乃下詔褒美其行贈滄州刺史以旌厥異

皇甫遐字永賢河東汾陰人也累世寒微而鄉里稱其和睦遐性純至少喪父事母以孝聞後遭母喪乃廬於墓側負土爲墳復於墓南作一禪窟陰雨則穿窟晴霽則營墓曉夕勤力未嘗暫停積以歲年墳高數丈周迴五十餘步禪窟重臺兩匝總成十有二室中間行道可容百人遐食粥枕土櫛風沐雨形容枯悴家人不識當其營墓之初乃有鴟烏各一徘徊悲鳴不離墓側若助遐者經月餘日乃去遠近聞其至孝競以米麵遺之遐皆受而不食悉以營佛齋焉郡縣表上其狀有詔旌異之

張元字孝始河北芮城人也祖成假平陽郡守父延儻仕州郡累爲功曹主簿並以純至爲鄉里所推元性謙謹有孝行微涉經史然精釋典年六歲其祖以其夏中熱欲將元就井浴元固不肯從謂其貪戲乃以杖擊其頭曰汝何爲不肯浴元對曰衣以蓋形爲覆其褻元不能褻露其體於白日之下祖異而捨之南隣有二杏樹杏熟多落元園中諸小兒競取而食之元所得者送還其主村

陌有狗子爲人所棄者元卽收而養之其叔父怒曰何用此爲將欲更棄之元對曰有生之類莫不重其性命若天生天殺自然之理今爲人所棄而死非其道也若見而不收養無仁心也是以收而養之叔父感其言遂許焉未幾乃有狗母銜一死兔置元前而去及元年十六其祖喪明三年元恆憂泣晝夜讀佛經禮拜以祈福佑後讀藥師經見盲者得視之言遂請七僧然七燈七日七夜轉藥師經行道每言天人師乎元爲孫不孝使祖喪明今以燈光普施法界願祖目見明元求代闇如此經七日其夜夢見一老翁以金篦療其祖目於夢中喜躍遂卽驚覺乃徧告家人三日祖目果明其後祖臥疾再周元恆隨祖所食多少衣冠不解旦夕扶持及祖沒號踴絕而後蘇隨其父水漿不入口三日鄉里咸歎異之縣博士楊軌等二百餘人上其狀有詔表其門閭

王頌字景彥太原祁人也父僧辯南史有傳頌少倣儻有文武幹局僧辯平侯景留頌荊州遇梁元帝爲周師所陷頌因入關聞其父爲陳武帝所殺號慟而絕食頃乃蘇哭不絕聲毀瘠骨立至服闋常布衣蔬食藉藁而臥周明帝嘉之

召授右侍上士累遷漢中太守尋拜儀同三司隋開皇初以平蠻功加開府封虵丘縣公獻取陳之策上覽而異之召見言畢獻欵上爲之改容及大舉伐陳頴自請行率兵數百人從韓擒虎先鋒夜濟力戰被傷恐不堪復鬪悲感嗚咽夜中睡夢有人授藥比寤而瘡不痛時人以爲孝感及陳滅頴密召父在時士卒得千餘人對之涕泣其間壯士或問曰郎君讎恥已雪而悲哀不止者將不爲霸先早死不得手刃之邪請發其丘隴斲櫬焚骨亦可申孝心矣頴頓顙陳謝額盡流血答曰其爲墳塋甚大恐一宵發掘不及其屍更至明朝事乃彰露諸人請具鍬鍤於是夜發其陵剖棺見陳武帝鬚皆不落其本皆出自骨中頴遂焚骨取灰投水飲之旣而自縛歸罪晉王表其狀文帝曰朕以義平陳王頴所爲亦孝義之道何忍罪之舍而不問有司錄其戰功將加柱國賜物五千段頴固辭曰臣緣國威靈得雪怨恥本心徇私非是爲國所加官賞終不敢當帝從之拜代州刺史甚有惠政卒於齊州刺史

弟頴字景文年數歲而江陵亡同諸兄入關少好游俠年二十尙不知書爲其

兄顛所責怒於是感激始讀孝經論語晝夜不倦遂讀左傳禮易詩書乃歎曰
書無不可讀者勤學累載遂徧通五經究其旨趣大爲儒者所稱解綴文善談
話年三十周武帝引爲露門學士每有議決多顛所爲性識甄明精力不倦好
讀諸子徧記異書以博物稱又曉兵法益有從橫之志每歎不逢時常以將相
自許開皇五年授著作佐郎尋令於國子講授會帝親臨釋奠國子祭酒元善
講孝經顛與相論難詞義蜂起善往往見屈帝大奇之超授國子博士後坐事
解職配防嶺南數載授漢王諒府咨議參軍王甚禮之時諒見房陵及秦蜀二
王相次廢黜潛有異志顛陰勸諒繕甲兵及文帝崩諒遂舉兵反多顛之計也
顛後數進奇策諒不能用楊素至蒿澤將戰顛謂其子曰氣候殊不佳兵必敗
汝可隨從我旣而兵敗顛將歸突厥至山中徑路斷絕知必不免謂其子曰吾
之計謀不滅楊素但爲言不見從遂至於此不能坐受禽執以成豎子之名也
吾死後汝慎勿過親故於是自殺瘞之石窟中其子數日不得食遂過其故人
竟爲所禽楊素求顛屍得之斬首梟於太原所撰五經大義三十卷有集二十

卷並因兵亂無復存焉

楊慶字伯悅河間人也祖玄父剛並以至孝知名慶美容止性辯慧年十六齊國子博士徐遵明見而異之及長頗涉書記年二十五郡察孝廉以侍養不赴母有疾不解襟帶者七旬及居母憂哀毀骨立負土成墳齊文宣表其門閭賜帛及綿粟各有差隋文帝受禪屢加褒賞擢授儀同三司板平陽太守卒於家田翼不知何許人也養母以孝聞其後母臥疾歲餘翼親易燥濕母食則食母不食則不食隋開皇中母患暴痢翼謂中毒藥遂親嘗穢惡母終翼一慟而絕妻亦不勝哀而死鄉人厚共葬之

紐因字孝政河東安邑人也性至孝周武成中父母喪廬於墓側負土成墳廬前生麻一株高丈許圍之合拱枝葉鬱茂冬夏恆青有烏棲上因舉聲哭烏卽悲鳴時人異之周武帝表其閭擢授甘棠令隋開皇初卒子士雄少質直孝友喪父復廬於墓側負土成墳其庭前有一槐樹先甚鬱茂及士雄居喪樹遂枯死服闋還宅死槐復榮隋文帝聞之歎其父子至孝下詔褒揚號其里爲累德

劉仕儔彭城人也性至孝丁母喪絕而復蘇者數矣勺飲不入口者七日廬於墓側負土成墳列植松柏虎狼馴擾爲之取食隋文帝受禪表其門閭

翟普林楚丘人也事親以孝聞州郡辟皆不就躬耕色養鄉閭謂爲楚丘先生後父母疾親易燥濕不解衣者七旬大業初父母俱終哀毀殆將滅性廬於墓側負土成墳盛冬不衣繒絮唯著單縗而已家有烏犬隨其在墓若普林哀臨犬亦悲號見者嗟異有二鵲巢其廬前柏樹入廬馴狎無所驚懼司隸巡察奏其孝感擢授孝陽令

華秋汲郡臨河人也幼喪父事母以孝聞家貧傭賃爲養其母患疾秋容貌毀悴鬢鬚盡改母終遂絕櫛沐髮盡禿落廬於墓側負土成墳有人欲助之者秋輒拜而止之隋大業初調狐皮郡縣大獵有一兔逐之奔入秋廬中匿秋膝下獵人至廬所異而免之自爾此兔常宿廬中馴其左右郡縣嘉其孝感具以狀聞降使勞問而表其門閭後羣盜起常往來廬之左右咸相誡曰勿犯孝子鄉

賴秋全者甚衆

徐孝肅汲郡人也宗族數十家多以豪侈相尙唯孝肅儉約事親以孝聞雖在幼小宗黨間每有爭訟皆至孝肅所平論短者無不引咎而退孝肅早孤不識父及長問其母父狀因畫工圖其形構廟置之而定省焉朔望享祭養母至孝數十年家人未見其忿恚色母老疾孝肅親易燥濕憂悴數年見者莫不悲悼母終孝肅茹蔬飲水盛冬單縷毀瘠骨立祖父母父母墓皆負土成墳廬于墓所四十餘載被髮徒跣遂以終身其弟德備終子處默又廬於墓側奕世稱孝焉

論曰塞天地而橫四海者唯孝而已矣然則孝始愛敬之方終極哀思之道厥亦多緒其心一焉若上智稟自然之質中庸有企及之義及其成名其美一也長孫慮等或出公卿之緒藉禮教之資或出茆簷之下非獎勸所得並因心乘理不踰禮教感通所致貫之神明乃有負土成墳致毀滅性雖乖先王之典制亦觀過而知仁矣

北史卷八十四考證

孝行傳敘匹夫匹婦行之於閭閻○匹豎本訛疋今改正

長孫慮傳更相鞠養不能保全○鞠豎本誤鞠今改從南本

閻元明傳三世同居闔門有禮○豎本缺居闔門三字今從南本增入

吳悉達傳隣人孤貧窘困者○困豎本訛因今改正

荆可傳塋域極大榛蕪至深○榛豎本訛榛今改正

王頌傳以平蠻功加開府封虵丘縣公○虵豎本訛地今改從隋書

弟頰傳○頰並無孝行可稱乃因頌而並附於傳後殊不可解

翟普林傳家有烏犬隨其在墓○犬豎本訛大今改從南本

北史卷八十四考證